

## Gwom 'Borga/ Isi ki Gwo ma MARKUS mo

*Gwo jin Çin ma Yohaán jin Ta'da Manmiiya Mii  
ki Yi'de/ mo*

<sup>1</sup> Montel 'pen gi gwom 'borga/ ma Yesus Kristhos jin ta Ya/ ma Arungimis mo be.

<sup>2</sup> Me'd gwo jin 'kwarkunu eya Ishaya jin ta'da mançi gwo ma Arungimis kadhamo/ mo ki: Hili mo mo ma. Aha/ hashkina agum bway pem ibwambori jis/em pini mo. a'di jin midi thoson /e bway mo.

<sup>3</sup> 'Twa/ gi wathin 'de/ mmocuu gwo em bwaasho ki:

Thosoni bway gi Tapa mo ma, kari bway piti ka ji sho'k mo.

<sup>4</sup> Yohaán jin ta'da manmii 'kwani ki yi'de/ a'di piki'd mo e mombwaasho mo mmoci gwo mo gom mo jin minu miiya mii ki yi'de/ mo mmorica du is mo gom gwo gi miinthus kun minu gwam 'kwani mo.

<sup>5</sup> Dhali aris 'kwani iikin ka pije/ e a'di mo 'peni aris bampa/ gi Pa Yahuudiyya mo dhali 'peni aris 'kwani gi Pa Urushaliim mo. Dhali uni 'kokunu mo mmomii ki yi'de/ ki a'di mo e Yi'den Kumma/ Uurdun mo mmopikina uni gwo gom miinthus buni mo be.

<sup>6</sup> Dhala Yohaán si'da/ hi'thki'da mur kalman e isi a'di mo dhali a'di ta'd gi waçkan jin hi'thkina a'di e empa'd piti mo dhali a'di 'ka'da kuuyu/ dhali shwa'da dham eya kur mo be.

<sup>7</sup> Dhali a'di ciki gwo mo mmo/o gwo mo ki: N'ko'di aha/ mo tani jamu/ midi pu'du/ mo jin ca'd ki aha/ mo. Dhali waɕkana ppam piti mo tani aha/ dinaki ha me'd mo mmoluŋ ki ji luŋ mo dhali 'cuŋ uni mo be.

<sup>8</sup> Aha/ miikina um ki yi'de/ tani hili a'di midi mii um ki Shi/in Dheleladhelel mo be.

### *Mo jin Miinuwa Yesus ki Yi'de/ mo*

<sup>9</sup> Dhali ka tee gwansan mo tani Yesus pu'dki'd mo 'peni Pa Naasira jin di'd e Pany Jaliil mo dhali a'di miikunu ki yi'de/ ka Yohaana mo e Yi'deŋ Kuma/ Urdun mo be.

<sup>10</sup> Dhali ki a'di piki'd ka piye/ 'peni yi'de/ mo tani ise/ ki jahanne/ a'di parki momis e mo mmodi ki kany dhali Shi/in di'd mmothulu/ i a'di mo me'd gurko/ mo be.

<sup>11</sup> Dhali 'twa/ cikunu 'peni momis mo ki: /E ta Ya/m pem jin enka/ mo, dhali aha/ 'bora bwa ki 'bor ki /e mo.

### *Mo gi Paluwa Yesus mo*

<sup>12</sup> Dhali Shi/in Dheleladhelel a'di urki'da Yesus ka piye/ ise/ mo e mombwaasho mo.

<sup>13</sup> Dhali a'di diki'd e mombwaasho mo ka cim ma isu/ mo, dhali a'di palkunu ka Seŋaan mo. Dhali a'di nyaŋki di ki tombwaasho mo. Dhali iman'doyu gwo pu'dkin mo dhali mii a'di to mo be.

### *Yesus Telki Mii ma Tu'd Piti 'Pen mo*

<sup>14</sup> Dhali ka Yohaana karkunu eya sijn mo tani Yesus pu'dki'd mo e Pany Jaliil mo mmoçi gwom 'bora/ ma Arungimis mo

<sup>15</sup> dhali mmo/o gwo mo ki: Mo thimkunu mo, dhali Bampa/ ma Arumgimis pu'dki'd e me'd mo. Rici adu is mo ma dhali gam gwom 'borga/ is mo.

*Yesus Yukki Imancesh To Yi'de/ Idojon mo*

<sup>16</sup> Dhali me'd jin yakina a'di ki yampe e she-men ma gap ma Al ma Jaliil mo tani a'di parki'da Simaan e mo dhala Andaraawus jin ta'da kam ma Simaan mo mmobitkina a'di a'thi/ eya al mo haali/ uni ta 'kwani kun ta imancesh to yi'de/ mo be.

<sup>17</sup> Dhala Yesus ki o uni gwo mo ki: Bathi aha/ nsho'k mo ma, dhali aha/ mina dhu um mmowar ki imanbu'th 'kwani ki gwo mo be.

<sup>18</sup> Dhali ki jahanne/ uni dhalkina 'thim buni 'pen mo dhali uni ki bath a'di nsho'k mo be.

<sup>19</sup> Dhali mmothothkina a'di is ari'ceenne/ mo tani a'di parki'da Yakuub e mo jin ta ya/ ma Sabadi dhala Yohaana jin ta'da kam piti mo uni kun 'kokin eya kur buni mo mmoshowa 'thi/ mo be.

<sup>20</sup> Dhali ki jahanne/ a'di ki yuk uni mo. Dhali uni dhalkina babam buni ka Sabadi eya kur mo nyakki cinjina/ kun miina tu'c mo dhali bath a'di nsho'k mo be.

*Wathi/ jin Bu'th ma Arum Thus jin Nyo/o'd mo*

<sup>21</sup> Dhali ki uni pu'dkin mo e Paṅ Kapranahuum mo tani dhali ki jahanne/ a'di seki gu'b gi montul is buni ka cim ma pesu/ mo dhali a'di torki gwo mo be.

<sup>22</sup> Dhali uni merkin mo gom gwom piti jin torkina a'di mo haali/ a'di torki uni gwo mo me'd wathi/ jin ta gi moshirr mo dhali yisa me'd iman'kwar to mo.

23 Dhali ki jahanne/ wathiŋ kamu/ diki'd e gu'b montul is buni mo a'di jin taki'd ga rum thus jin nyo/o'd mo be.

24 Dhali a'di cuuki'd ki dhan 'twa/ caaca mo mmo/o gwo mo ki: Ki /e mini mii atinta ki aman mo, Yesu gi Pa Naasira mo? A/e pu'dkin mo mmo'ce'd aman sho'k mo? /E mishka/ ki /e ta a'din tal 'de/ ma Arungimis jin kogu mo.

25 Hila Yesu kucurki a'di ki gwo mo mmo/o gwo mo ki: Ca'bi ki shwam. Piyu/ ka pije/ 'peni a'di mo.

26 Dhala rum thus jin nyo/o'd ki tor a'di 'ko'da 'cesh mo dhali cuu gwo ki dhan 'twa/ jin caaca mo. Dhali a'di ki pi ka pije/ 'peni a'di mo.

27 Dhali uni 'baar mo merkin mo. Dhali wakan, uni dotki gwondot e bwam uni mo mmo/o gwo mo ki: Mii yan ta'da taye? Gwon this jin toru de. Ki moshirr maja sa/ ikankina a'di arum thus kun nyo/on gwo mo dhali uni ha a'di gwo e mo?

28 Dhali ki jahanne/ gwom piti yaki'd ki lala'th mo e mo 'baar mo ki tur mo eya ris bampa/ kun 'kon ki jin 'kam mo e bampa/ gi Pany Jaliil mo be.

*Yesu Waḱki'da Mar ma Simaan jin Ta'da 'Bomi mo*

29 Dhali ki jahanne/ a'di dhalki gu'b gi montul is buni 'pen mo dhali a'di cicki'd mo e gu'b ma Simaan mo dhala Andaraawus mo nyakka Yakuub mo dhala Yohaana mo be.

30 Dhala mar ma Simaana 'bomi, a'di 'ba'thki'd mo mmo/ish 'ko'da 'cesh ki 'batha thunya/ mo dhali ki jahanne/ uni ki torki a'di ayim mo be.

31 Dhali a'di pu'dki'd mo mmobutha yim mme'd mo dhali 'deka yim ki mis mo dhala thunya/

dhalki'da yim 'pen mo, dhala yim miiki uni to mo be.

*Yesus Waçki 'Kwani ka Ris Mom'pimpili/ mo*

<sup>32</sup> Dhali ki mo ta mom'pimpili/ mo jin yulkin ma tente/ mo tani uni kalki 'kwani e a'di mo, aris uni gun 'ba'thkin mo dhali uni kun bu'thkin ma ruma 'cesh mo be.

<sup>33</sup> Dhali aris 'kwani gi 'penkuman bampa/ 'baar mo tulki is mo mmontal 'de/ mo e shan'tamo/ mo be.

<sup>34</sup> Dhali a'di ki waç uni ka ris mo, uni gun 'ba'thkin mo ki 'ba'th ki she/ ki she/ mo, dhali a'di ki ura ruma 'cesh ka pije/ mo, dhali a'di diki dhala ruma 'cesh bway mo mmowal 'twa/ mo haali/ uni nyithki a'di mo be.

*Yesus Yaki'd mo Mmoçi Gwom 'Borga/ mo*

<sup>35</sup> Dhali ki mo ta mon'thamo/ ka 'tum gana/ mo ki monkush ntwa/a/ mo tani a'di cuki mis mo dhali ya mo e mo jin pina 'kwani mo, dhali a'di ki 'tho mo be.

<sup>36</sup> Dhala Simaan dhali uni gwansan kun nyaçki 'ko ki a'di mo tani bathki a'di nsho'k mo be.

<sup>37</sup> Dhali uni gamki a'di mo dhali o a'di gwo mo ki: Aris 'kwani 'baar mo ñapki /e mo be.

<sup>38</sup> Dhali a'di ki o uni gwo mo ki: Dhalki ana iina mo e bampa/ kun 'dish yan is mo, ki aha/ mina çi gwo mmun si'da/ mo. Haali/ gom mii gi wakan mo tani a'di ipu'dkika/ mo be.

<sup>39</sup> Dhali a'di yaki'd ki tur mo e bampa/ gi Pany Jaliili 'baar mo mmoçi gwo mo e gu'b gi montul is buni mo dhali mmo/ura ruma 'cesh ka pije/ mo be.

*Yesus Dhelelki Wathi/ jin 'Kosha Monthus Is mo*

40 Dhali wathi/ jin 'kosha monthus pu'dki'di a'di mo mmonap mowoth 'peni a'di mo, dhali ca'bki jin 'kupa'dupun mo dhali o a'di gwo mo ki: Wakki/ /e ona bwa mo tani /e mishi aha/ dhelel mo.

41 Mmogukina a'di a'di ki e ma 'thime/ ki mo/en mo tani a'di ki he'th me'd piti mo dhali ta a'di is ki me'd mo dhali o a'di gwo mo ki: Aha/ ona bwa mo be. Dheleli mo ma.

42 Dhali ki jahanne/ monthus dhalki a'di 'pen mo dhali a'di dhelelkina is mo be.

43 Dhali a'di ki kan a'di gwo ki 'bi'th mo dhali hash a'di mo mmoyaku/ mo ki jahanne/ mo

44 dhali tor a'di gwo mo ki: Hili miim pini i e ki 'bore/ mo ki /e mini diki tor jan tal 'den kamu/ gwo mo. Hili yaku/ mo dhali tora gasiis is pini i e mo dhali ci a'di to gom is pini jin dhelelkunu mo me'd gwonkan jin kankin ma Musa mo haali/ a'di ta gwo jin nyo/a 'kwani mo.

45 Hili a'di yaki'd ka pije/ mo dhali tel mii 'pen mo mmobah gwo gom a'di 'bakany mo dhali mmokal gwo ki lala'th mo. Wakan a'di mol ma Yesus cic bampa/ dok/e mo eya tente/, hili a'di di'd ka pije/ 'peni bampa/ mo, dhali 'kwani pu'dkini a'di mo 'peni aris shemen bampa/ mo be.

## 2

### *Yesus Wacki Wathi/ jin Mutta/ Is Is mo*

1 Dhali ki a'di dokki'd ka nyan'ko'd mo 'peni Pan Kapranahuum 'ko'da cim ka hony/e mo tani gwo toru mo ki a'di di'di pa mo be.

2 Dhali 'kwani ka ris tulki is mo mmontal 'de/ mo. Wakan, mo piyi'd gom uni mo. Monkamu/

yisa di'da shan'tamo/ si'da/ mo. Dhali a'di di'd mo mmoci uni gwo mo be.

<sup>3</sup> Dhali uni pu'dkin mo dhali kali wathi/ jin mutta/ is mo e a'di mo, jin kalkina 'kwaniḡ gwasi doḡon mo be.

<sup>4</sup> Dhali ki uni mol a'di 'dish is mo goma waambuhany 'kwani mo tani uni ka'cki 'kungu'b mo 'peni 'kupi a'di mo. Dhali ki uni tupki mo i e mo tani uni ki dhala ci me'd ki wathi/ i e jin mutta/ is mo be.

<sup>5</sup> Dhali ka Yesus parki monḡam gwo is buni e mo tani a'di ki o wathi/ jin mutta/ is gwo mo ki: Ya/m pem, miinthus pini gwamkunu /e mo be.

<sup>6</sup> Dhali iman'kwar ton tiya, uni 'kokin mo mmodotḡ gwo mo eya dum buni mo ki:

<sup>7</sup> Katinta sa/ i/ona wathi/ yansan gwo gi wakan mo? A'di walki gwo sor mo. Kaja a'di midi mish gwam 'kwani gom miinthus mo, hili jasa Arumgimis a'di 'de/ mo be.

<sup>8</sup> Dhali ki jahanne/ Yesus nyithki'd e is piti ki uni tan gi gwondotḡ wakan e is buni mo dhali a'di ki o uni gwo mo ki: Atinta dotkina um gwondotḡ eya dum bum kan mo?

<sup>9</sup> Ki ji gi 'ka'da mii mane ti, mmo/o wathi/ jin mutta/ is gwo mo ki: Miinthus pini gwamkunu / e mowa? walla mmo/o gwo mo ki: Cuyi mis mo dhali 'deka cim pini mo dhali yayi mo?

<sup>10</sup> Hili ki um mini mish ki Ya/ gi 'Kwani ta gi moshirr mo e mony'cesh yan mo mmogwam miinthus gi 'kwani mo, a'di ki o wathi/ jin mutta/ is gwo mo ki:

<sup>11</sup> Aha/ ona /e gwo mo ki: Cuyi mis mo dhali kala cim pini mo dhali yayi bway pa mo.

12 Dhali a'di cuki mis mo dhali ki jahanne/ a'di ki kala cim piti mo dhali ya ka pije/ mbwambori uni 'baar mo. Wakan aris uni 'baar mo merkin mo dhali karkina Arumgimis ki ca mo mmo/o gwo mo ki: Ana 'konaki par ji gi wakan e me'd 'de/ ki sule/ mo be.

*Mo jin Yuḱkunuwa Lawi mo*

13 A'di yayi'd ka pije/ mo dok/e e shemen ma gap ma al mo, dhala dhana buhany wathimpa tulki is i a'di mo, dhali a'di ṭorki uni gwo mo be.

14 Dhali ki a'di yaki'd ki yampe mo mbway mo tani a'di parki'da Lawi e mo a'di jin ta ya/ ma Halpa mo mmodikina a'di mo e mo jin teruwa thulpa/ mo, dhali a'di ki o a'di gwo mo ki: Bathi aha/ nsho'k mo ma. Dhali a'di cuki mis mo dhali bath a'di nsho'k mo be.

15 Dhali ki a'di ca'bki'da tharabeesa e gu'b piti mo tani imantera thulpa/ ka ris dhali imanmii miinthus 'kokin nyakka Yesus mo dhali imancik a'di gwo mo, haali/ 'kwani tana ris ka ris kun bathki a'di nsho'k mo be.

16 Dhali iman'kwar to dhali 'Kwani Parisiyiin ki uni parki a'di e ki a'di shwaki to nyakki uni gun ta imanmii miinthus mo dhali imantera thulpa/ mo tani uni ki doṭ imancik a'di gwo gwo mo ki: Atinta ishwana a'di to nyakki imantera thulpa/ mo dhali nyakki uni gun ta imanmii miinthus kanni?

17 Dhali ka Yesus cikki a'di yan mo tani a'di ki o uni gwo mo ki: 'Kwani gwansan kun 'kon ki 'bore/ mo tani uni mini 'koki mii ta ga hakiim mo, hili uni gwansan kun 'ba'thkin mo be. Aha/ pu'dkina mo yisa mmoyuk 'kwani kun mii miinḱar/e hili gom imanmii miinthus mo be.



*Gwo jin Dotu mo gom To jin Ga/u mo*

<sup>18</sup> Dhali imanci<sub>ka</sub> Yoha<sub>an</sub> gwo dhali 'Kwani Parisiyi<sub>in</sub> uni ga/ki to mo dhali 'kwani pu'dkini a'di mo dhali o a'di gwo mo ki: Katinta si'da/imiina imanci<sub>ka</sub> Yoha<sub>an</sub> gwo mii mo dhali 'Kwani Parisiyi<sub>in</sub> mmoga/ to mo, hili imanci<sub>k</sub>/e gwo uni 'koki ga/ to mo be.

<sup>19</sup> Dhala Yesu<sub>s</sub> ki tho<sub>k</sub> uni gwo mo ki: Mina 'kwani yilkina/ gwansan, uni kun yu<sub>ku</sub> mo e momiimash mo mish to ga/ mo ki wathinya<sub>ṅa</sub>'b diki'd nya<sub>ḱ</sub>ki uni naskina/ mo 'taa? Me'd jin dikina wathinya<sub>ṅa</sub>'b e bwam uni mo tani uni moli to ga/ mo be.

<sup>20</sup> Atee midi pu'du/ mo ki wathinya<sub>ṅa</sub>'b minu susu/ 'peni uni mo tani dhali yan'ko'd uni ki ga/ to ka tee caan mo be.

<sup>21</sup> Wathi<sub>ṅ</sub> kamu/ yisa di'da jin sho burrinyen this apo/ sharkin burrinyen dhamo/ mo. Wak<sub>ki</sub>/ a'di midi mii kan mo tani mo jin 'dapu midi dher bwa 'peni a'di jin ta jin this mo 'peni jin dhamo/ mo, dhali mondhere'd midi war ki shi/ mo.

<sup>22</sup> Dhali wathi<sub>ṅ</sub> kamu/ yisa di'da jin midi kar yimana mura'th jin ta jin this mmowol a'di e kuca<sub>ṅ</sub> jin wolu yimana muratha dhamo/ mo. Wak<sub>ki</sub>/ a'di midi mii kan mo tani yimana mura'th midi 'twak kuca<sub>ṅ</sub> mo dhali yimana mura'th midi ga<sub>ca</sub> sho mo. Dhali wakan kuca<sub>ṅ</sub> minu dher bwa mo, hili yimana mura'th this minu mii wol mo e kuca<sub>ṅ</sub> this jin da<sub>ka</sub> ku<sub>cu</sub>ru/ mo be.

*Imanci<sub>k</sub> Gwo Uni 'Ce'dki Pos ka Cim ma Pesu/ mo be*

<sup>23</sup> Ka cim ma pesu<sub>ṅ</sub> kamu/ tani a'di yaki'd ki tur mo e bwam bunto mo. Dhali ki uni ta<sub>n</sub>ki bway

buni mo tani imancik a'di gwo telki mii 'pen mo mmo'ce'd pos mo be.

<sup>24</sup> Dhali 'Kwani Parisiyin o a'di gwo mo ki: Hili ma, atinta imiina uni to jin dina gwonkan ma cim ma pesu/ ki dhal bway mo?

<sup>25</sup> Dhali a'di ki thok uni gwo mo ki: 'Kona um ki den gwo e mo gom mii ma Dawuu'd mo 'taa? ki a'di midi mii ta gi to mo dhali ki a'di 'kosha te/ mo tani a'di dhali uni gwansan kun nyakki 'ko ki a'di mo.

<sup>26</sup> A'di cikki gu'b ma Arumgimis mo ka Abi/ athaar di'd jin ta'da gasiis jin ca'd mo, dhali shwa tonte/ jin di'di bun'kus ma Arumgimis mo, a'di jin dina gwonkan ki dhal bway mo gom 'kwanin tiya mo, hili jasi gom igasiis uni 'cena mmoshwa mo be. Dhali a'di si'da/ ki ciki uni gwansan kun nyakki 'ko ki a'di mo be.

<sup>27</sup> Dhali a'di ki o uni gwo mo ki: Acim ma pesu/ karkunu mo gom wathi/ mo, yisa wathi/ goma cim ma pesu/ mo.

<sup>28</sup> Wakan Ya/ gi 'Kwani si'da/ a'di ta tapa goma cim ma pesu/ mo be.

### 3

#### *Wathi/ jin Kutha Me'd Gunkuru/ mo*

<sup>1</sup> Dok/ e a'di cikki gu'b gi montul is mo dhali wathi/ diki'd jin ku'thkina me'd gunkuru/ mo be.

<sup>2</sup> Dhali uni timki a'di mo mmopar a'di e mo wakki/ a'di midi 'taki waç a'di ka cim ma pesu/ mo, wakan ki uni mini 'taki ta gi gwo mmoyer a'di is ki gway mo be.

<sup>3</sup> Dhali a'di ki o wathi/ jin kutha me'd gunkuru/ gwo mo ki: Yayu/ ise mo ma.

<sup>4</sup> Dhali a'di ki o uni gwo mo ki: A'di ta mii jin dhala gwoṅkan bway mo mmomii mii jin 'boro'd ka cim ma pesu/ mo 'taa? walla mii jin ta jin thus minu mii mo? mmowotha/ woth mo 'taa? walla mmo'kosha 'kosh mo? Hili uni 'kon ki shwam mo be.

<sup>5</sup> Dhali a'di ki hil mo mo mmo'kar mo ki e mo ka nyor e uni mo mmokal bwa diṅ mo goma dum buni kun 'bitha'bi'th mo. Dhali a'di ki o wathi/ gwo mo ki: Hethi me'd pini mo ma. Dhali a'di he'thki a'di mo dhali me'd piti waṅkunu mo be.

<sup>6</sup> Dhali 'Kwani Parisiyiin iikin ka pije/ mo dhali ki jahanne/ uni ki gam 'twa/ 'kup nyakki 'Kwani Hirodusiyyin apo/ a'di mo mmo'ce'd a'di sho'k mo be.

### *Adhana Waambuhany 'Kwani 'Kokini Shemen ma Al mo*

<sup>7</sup> Yesus a'di yaki'd mo nyakki imancik a'di gwo mo e shemen ma al mo dhala dhana buhany wathimpa 'peni Pany Jaliil bathki a'di nsho'k mo. Dhali 'peni Pa Yahuudiyya si'da/ mo be

<sup>8</sup> dhali 'peni Pa Urushaliim mo dhali 'peni Pa Adumiyya mo dhali 'peni bampa/ jin di'd e bwampo/ Yi'deṅ Kumma/ Uurdun mo dhali 'peni Pan Sur mo dhali 'peni Pa Saydaa/ mo, dhana waambuhany 'kwani mmocika uni gwo mo goma ris mii kun miikina a'di mo tani, uni pu'dkini a'di mo be.

<sup>9</sup> Dhali a'di torki imancik a'di gwo gwo mo mmothosona kur gom a'di mo goma waambuhany 'kwani mo, isi ciki/ ki uni mini 'koki 'taki yap a'di ki is mo.

<sup>10</sup> Haali/ a'di waçki'da waç ka ris mo, wakan ki aris uni kun 'koshkina 'ba'th ka ris mo gaçkina gaç mo mmota a'di is ki me'd mo.

<sup>11</sup> Dhali ka rum thus kun nyo/on parki a'di e mo tani uni ta'kkina 'cesh mbwambori a'di mo dhali cuu gwo ki dhan 'twa/ kun caaca ki: /E ta Ya/ ma Arumgimis mo be.

<sup>12</sup> Dhali a'di ki kan uni gwo ki 'bi'th mo mmodhalku/ ki dhal a'di ki a'di minu mish mo.

*Yesus Kwanyki Uni kun 'Koni 'Kume'd I'ce'dka Su/mo*

<sup>13</sup> Dhali a'di yaki'd ka gagamis e moñ'kuwosh mo dhali a'di ki yuq uni gwansan nyaçki a'di mo, uni kun ona bwa a'di ki sus mo. Dhali uni pu'dkini a'di mo be.

<sup>14</sup> Dhali a'di ki dhu uni kun 'koni 'kume'd i'ce'dka su/ mo mmonyaç 'ko ki a'di mo dhali mmohash uni mmoçi gwo mo

<sup>15</sup> dhali mmota gi moshirr mo mmo/ura ruma 'cesh ka piye/ mo.

<sup>16</sup> Simaan, a'di jin yuqkunu gway ka Buçerus mo,

<sup>17</sup> dhala Yakuub jin ta ya/ ma Sabadi mo dhala Yohaani jin ta'da kam ma Yakuub mo, uni kun yuqkina a'di gway ka Buwanarjis mo jin ta 'pemen gwo jin onu ki iya/ ma wara sho'k mo.

<sup>18</sup> Dhala Andaraawus mo dhala Pilibbus mo dhala Bartulamaawus mo dhala Matta mo dhala Tuuma mo dhala Yakuub jin ta ya/ ma Halpa mo dhala Taddaawus mo dhala Simaan gi Pañ Kaana mo,

<sup>19</sup> dhala Yahuusa Iskariyuuti jin 'cithi/ a'di is ki gwo mo be.

*Gwo Sor jin Walu apo/ Shi/in Dheleladhelel mo*

Dhali yan'ko'd a'di yaki bway pa mo be.

<sup>20</sup> Dhala waambuhany 'kwani pu'dkin mo dhali tuli isi montal 'de/ dok/e mo. Wakan uni 'koki ta gi mo mo mmoshwa to mo.

<sup>21</sup> Dhali ki imugum piti cikki gwo gom a'di mo tani uni pu'dkin mo dhali nap a'di mo mmobu'th mo haali/ uni o gwo mo ki: A'di guski'da du mo be.

<sup>22</sup> Dhali iman'kwar to pu'dkin mo ka lungu'b 'peni Pa Urushaliim mo mmo/o gwo mo ki: A'di bu'thkin ma Baalsebuul mo dhali ki gway gi tapa ma ruma 'cesh mo tani a'di urkina a'di aruma 'cesh ka pije/ mo be.

<sup>23</sup> Dhali a'di ki yuk uni i a'di mo dhali tor uni gwo mo ki gwom 'bi'th/e mo ki: A/ka Setaan mishi is piti ur ka pije/ ce Setaan mo 'taa?

<sup>24</sup> Wakki/ 'penkuman bampa/ kwa/u bwa mo e is piti mo tani 'penkuman bampa/ caan midi mol dosh mo be.

<sup>25</sup> Dhali wakki/ gu'b kwa/u bwa mo apo/ is piti mo tani gu'b caan midi mol dosh mo be.

<sup>26</sup> Dhali wakka Setaan midi cu mis apo/ is piti jin gana/ mo wakan dhali kwa/ bwa mo tani a'di midi mol dosh mo, hili a'di midi dak ka bwa i'ba/ mo be.

<sup>27</sup> Hili wathin 'deɲ kamu/ yisa di'da jin midi mish ciɓ gu'b gi wathi/ jin 'bitha'bi'th mo dhali shi/ tom piti is mo, hili isi ciki/ a'di midi mii deɓ wathi/ jin 'bitha'bi'th ka shi/ ntwa/a/ mo. Dhali yan'ko'd ka jin gana/ mo tani a'di midi shi/ gu'b piti is mo be.

<sup>28</sup> Ka jin gana/ aha/ ona um ki, aris miinthusi 'baar mo minu gwam ki iya/ gi 'kwani mo, dhala ris gwo sor gunn kun wala uni mo.

<sup>29</sup> Hili a'di jin wali gwo sor apo/ Shi/in Dhele-

ladhelel mo tani minu 'koki gwam miinthus piti ki sule/ mo, hili a'di dina mii m'ba/ ki sule/ sule/ e miinthus mo be.

<sup>30</sup> Haali/ uni oki gwo mo ki: A'di ta'd ga rum thus jin nyo/o'd mo be.

### *KoYesus dhali Ikam Piti mo*

<sup>31</sup> Dhali kum dhali ikam piti pu'dkin mo dhali dosha pije/ mo. Uni ki hash a'di gwo mo dhali yuk a'di mo be.

<sup>32</sup> Dhala dhana waambuhany 'kwani 'kokini 'kam a'di is mo dhali uni ki o a'di gwo mo ki: Kwan dhali ikam pini dhali i'bwahan uni 'kona pije/ mmahan mo mmodot/ e mo be.

<sup>33</sup> Dhali a'di ki thok gwo mo ki: Aja sa/ nta'da ta'dam pem dhali ikam pem mo?

<sup>34</sup> Dhali a'di ki hil mo mo mmo'kar mo ki e mo gom uni gwansan kun 'kon mmo'kam a'di is mo, dhali a'di ki o gwo mo ki: Ita'dam pem anan be dhali ikam pem anan mo be.

<sup>35</sup> A'diyin jin mii'd ki bwa ma Arumgimis mo tani a'di ita'da kam pem mo dhali 'bwah pem mo dhali ata'dam pem mo be.

## 4

### *Gwom 'Bi'th/e goma Ka'bany To jin Yeku mo*

<sup>1</sup> Dok/e a'di telki mii 'pen mo mmo'tor uni gwo e shemen ma gap mo. Dhala dhana waambuhany 'kwani caaca kagahara tulki isi a'di mo. Wakan a'di seki bwaa kur mo dhali ca'bi cine/ mo e bwa-man ma al mo. Dhala dhana waambuhany 'kwani uni 'koni shemen ma gap ma al mo eya 'cesh mo.

<sup>2</sup> Dhali a'di torki uni gwo ka ris mo ki gwom 'bi'th/e mo, dhali e gwom piti jin tora a'di uni mo tani a'di ki o uni gwo mo ki:

<sup>3</sup> Ba ciki gwo mo ma. Amanyeka ka'banya a'di ya'd ka pije/ mo mmoyek to mo.

<sup>4</sup> Dhali ki a'di yekki to mo tani aka'banya tiya ta'kkin mo e bway tur jin iinu mo. Dhali 'dii pu'dkin mo dhali los uni mo be.

<sup>5</sup> Dhali aka'banya tiya uni ta'kkin mo e mo wosh mo dhali uni daran ga 'cesh e embul mo. Dhali ki jahanne/ ki uni 'kana le/ mo haali/ uni dar ga 'cesh mo tani,

<sup>6</sup> dhali ka tente/ sulki'd ka nyor piti jin 'batha'ba'th mo dhali mmodara uni ka birman mo tani uni la shi'bil mo be.

<sup>7</sup> Dhali aka'banya tiya uni ta'kkin mo e bwam ma 'de/ mo dhali ka 'de/ can mo tani a'di cokotki uni mo dhali a'di moli maman dho'th mo be.

<sup>8</sup> Dhali aka'banya tiya uni ta'kkin mo eya 'cesh jin 'bora'bor mo dhali uni ki kala dho'th kagahara mo mmocakina uni mo dhali mmomarkina uniya mar is mo, mmogwono'dkina uniya dho'th ki iss 'de/ i'ce'dka 'kume'd eya tora 'de/ mo dhali ki iss 'kwanimpa ikwara mo dhali ki iss 'kwanimpa imudhe'd mo be.

<sup>9</sup> Dhali a'di ki o uni gwo mo ki: A'di jin ta'd gi gu'ban'ce mo mmocik gwo mo tani dhalki a'di cik gwo mo ma.

<sup>10</sup> Dhali ki a'di di'd a'di 'de/ mo tani dhali uni gwansan kun tulki isi a'di kun tana 'kume'd i'ce'dka su/ mo tani uni dotki a'di gwo mo isi gom gwom 'bi'th/e yan mo.

<sup>11</sup> Dhali a'di ki o uni gwo mo ki: Um cinu gwo jin cinu ki kup mo gom Bampa/ ma Arungimis mo,

hili gom uni gwansan kun 'kona pije/ mo tani uni a'di iminu torki gwo ki gwom 'bi'th/e mo be.

12 Wakan ki uni mini mii mish ka jin gana/ dhali 'koki nyith a'di mo, dhali uni ka jin gana/ mini cik a'di mo tani dhali 'koki mish a'di 'ban mo be. Hili isi ciki/ ki uni mini 'taki tu'k mo dok/e dhali uni minu 'taki gwamki miinthus buni mo be.

13 Dhali a'di ki o uni gwo mo ki: A/um si'da/ 'koki mish gwom 'bi'th/e yan 'ban mo? Um mini mish a'di 'ban kata aris gwom 'bi'th/e gwansan mo?

14 Amanyeka ka'bany to mo tani a'di ye'kki gwo mo be.

15 Dhali uni gwansan uni ita uni kun ta'kkin mo e bway tur mo e mo jin ye'ku gwo nycine/ mo. Dhali ki uni cikki gwo mo tani aSetaan ki jahanne/ pu'dki'd mo dhali kal gwo jin ye'ku e uni mo be.

16 Dhali uni gwansan si'da/ uni ita uni gun ye'kkunu mo e embula 'cesh wosh mo. Uni, ki uni cikki gwo mo tani uni la bu'th a'di ki jahanne/ ki bwan 'kunyud mo be.

17 Dhali uni tan ga birman yisa e is buni mo, hili uni 'kon jasi ari'ceenne/ mo, dhali yan'ko'd ki monto'c bwa walla mo gi 'koshuwa 'kosh cuki mis mo gom gway yan mo tani ki jahanne/ uni ta'kkin mo be.

18 Dhali aka'banya tiya uni gun ye'kkunu mo e bwam ma 'de/ mo tani uni ita uni gwansan kun cikki gwo mo be.

19 Hili uni bala to ga 'cesh is mo dhali 'penkapan buni jin el uni e ki el mo dhali bwam buni gun ona uni gom ton tiya mo tani cikina uni nycine/ mo dhali cokot gwo mo dhali a'di inyo/i uni mo ki uni moli dho'th mo be.



20 Hili uni gwansan kun yeku mo eya 'cesha 'borga/ mo tani uni ita uni gun cikki gwo mo dhali bu'th a'di mo dhali dho'th maman mo, eya tora 'de/ mo tani a'di dhotho'd ki iss 'de/ i'ce'dka 'kume'd mo, dhali eya tora 'de/ mo tani a'di dhotho'd ki iss 'kwanimpa ikwara mo, dhali eya tora kamu/ mo tani a'di dhotho'd ki iss 'kwanimpa imudhe'd mo be.

*Moŋkush jin Kumu 'Kup ki Toŋ'kul Bwa mo*

21 Dhali a'di ki o uni gwo mo ki: Alamba/ ki a'di kalkunu bway gu'b mo tani a'di kumkunu 'kup ki toŋ'kul bwa mo 'taa? walla karkunu mo e bwan'kwariny ma angar mowa? dhali a'di dinuki kara po/ tirkina/ mo 'taa?

22 Haali/ toŋ kamu/ yisa di'da jin minu bag mo isi ciki/ a'di minu mish eya tente/ mo. Walla toŋ kamu/ yisa di'da jin minu mii ka 'di/ mo, hili isi ciki/ uni minu mish ki moŋkush mo be.

23 Wakki/ wathin 'deŋ kamu/ ta'd gi gu'ban'ce mo tani dhalki a'di cikgwo mo ma.

24 Dhali a'di ki o uni gwo mo ki: Hili ki 'bore/ a'di jin cika um mo. A'di jin barkina um mo tani a'di minu barki um mo dhali to ki nyanye/ mo tani a'di minu ci ki um mo be.

25 Haali/ a'di jin ta'd gi to mo tani minu ciku/ ki nyanye/ mo. Dhali 'peni a'di jin dara'd mo tani, me'd jin tana a'di gi a'di mo tani a'di minu bu'th 'peni a'di mo be.

*Gwom 'Bi'th/e goma Ka'bany To jin Caki'd mo*

26 Dhali a'di ki o gwo mo ki: Bampa/ ma Arumgimis a'di wana e ki wathi/ jin midi 'taki pepera ka'bany bwa apo/ mony'cesh mo

<sup>27</sup> dhali 'taki ish e mo dhali cu mis mon'thiny mo dhali montee mo, dhali aka'bany midi 'taki 'ka ale/ mo dhali ca mo ki a'di molo'd mo be.

<sup>28</sup> A'cesh a'di dho'thki to ki is piti mo, ale/ a'di i'ka'di ṭwa/a/ mo dhali yan'ko'd akulpe/ mo dhali yan'ko'd maman gana/ mo.

<sup>29</sup> Hili ki maman iski'd mo tani a'di ki kar mo ma nyertḥa/ eya tente/ ki jahanne/ mo haali/ mo gi minu 'citḥ to mo pu'dki'd mo be.

*Gwom 'Bi'th/e gom Emen To jin Miinuwa 'Tash mo*

<sup>30</sup> Dhali a'di ki o gwo mo ki: Mina ana kar Bampa/ ma Arungimis ka par 'ban kata moye? walla gwom 'bi'th/e gi wakata imina ana i/o mo gom a'di mo?

<sup>31</sup> A'di wana e ki emena ka'bany to jin miinuwa 'tash mo, a'di jin yeḳkunu apowa 'cesh mo. A'di ta ara ka'bany to jin ca'ba e ki piri'th piri'th apowa 'cesh mo.

<sup>32</sup> Hili ki a'di yeḳkunu mo tani a'di caki'd mo dhali a'di warki'd ki dhan wurup mo dhali a'di ki pepera adhana bi mo. Wakan 'dii kun pen e mis mo tani uni nyan̄ki gu'b buni eya lam piti mo be.

*Mo gi Bu'th ma Yesus Gwom 'Bi'th/e Mmōtor mo*

<sup>33</sup> Ka ris gwom 'bi'th/e gi wakan mo tani a'di ki tor uni gwo mo me'd jin mina uni 'taki mish a'di mo be.

<sup>34</sup> A'di diki tor uni gwo ki dar gi gwom 'bi'th/e mo. Hili e imanciḳ gwom pitin̄ gana/ mo uni 'cena mo tani a'di ki be'd uni gwo 'baar mo be.

*Yesus Doshki'da Dhana Punthar 'Tham mo*

<sup>35</sup> Ka tee caan ki mo ta mom'pimpili/ mo tani a'di ki o uni gwo mo ki: Dhalki ana iina mo mmo'ciṭha/ gap gi 'bana kamu/ mo.

<sup>36</sup> Dhali mmodhalkina uni awaambuhany 'kwani 'pen mo tani uni suski a'di nyakki uni mo me'd jin ca'bkina a'di e bwam ma kur mo. Dhali akura tiya nyakki 'ko ki a'di mo be.

<sup>37</sup> Dhali adhana punthar 'tham poshki'd mo dhali yi'de/ birki bakal mo mmodora kur mo. Wakan akur a'di 'tu'dkina yi'de/ hila/ mo be.

<sup>38</sup> Hili a'di diki'd mo e bum 'pen ma kur mo mmo/ ish e apo/ burrine/ jin ishu 'ba/ mo. Dhali uni merki a'di e mo dhali o a'di gwo mo ki: Manṭor gwo, ki /e bunya/ dina is ki mer mo ki ana mina 'ce'd sho'k mo?

<sup>39</sup> Dhali a'di ki mer e mo dhali kucur 'tham ki gwo mo dhali o yi'de/ gwo mo ki: Roci sho'k mo dhali doshi munḡun mo. Dhali 'tham doshki'd mo dhali adhan mo dosh ki biyuu mo be.

<sup>40</sup> Dhali a'di ki o uni gwo mo ki: Katinta ko/ka uma ko/ ise? Um dar gi monḡam gwo is mo 'taa?

<sup>41</sup> Dhali uni 'kokunu mo mmo'tu'd ki mondee is mo dhali o gwo ka rem 'kup mo ki: Ki wathi/ jana a'dan sa/? ki 'tham dhali yi'de/ haki a'di gwo e mo?

## 5

*Wathi/ gi Paṅ Gadara jin Bu'thkin ma Ruma 'Cesh jin Waḡunu mo*

<sup>1</sup> Dhali uni pu'dkin ki 'ban ma gap ma ala kamu/ mo e bampa/ gi Paṅ Gadara mo be.

<sup>2</sup> Dhali ki a'di piki'd ka pije/ 'peni bwam ma kur mo tani a'di gamki 'kup ki wathi/ jin piki'd mo

'peni mon'kupaje jin taki'd ga rum thus jin nyo/o'd mo be.

<sup>3</sup> A'di jin ca'bki'd e mon'kupaje mo dhali wathin 'deŋ kamu/ yisa di'da jin mishki a'di deḵ ki sule/ mo isi ka jindhiir ilu/ mo.

<sup>4</sup> Haali/ a'di deḵkunu me'd ka ris ka makkiya mo dhala jindhiir mo, hila jindhiir bene'dkina a'di bwa mo dhali makkiya si'da/ 'ce'dkina a'di ka 'ci'cimi'th mo. Dhali wathin kamu/ yisa ta gi 'bitha mmo'te a'di mii 'twa/ mo.

<sup>5</sup> Mon'thiny dhali montee a'di diki'd mo e mon'kupaje mo dhali e mon'kuwosh si'da/ mo a'di cuuki gwo ki 'twa/ jin caaca mo dhali t̄ha'th is piti ki wosh mo be.

<sup>6</sup> Dhali ki a'di parki'da Yesus e mo 'pena dhana/ mo tani a'di guski'd mo dhali luŋ a'di mo be

<sup>7</sup> dhali a'di cuu gwo ki dhan 'twa/ jin caaca mo mmo/o gwo mo ki: Ki /e mini miiya tinta ki aha/, Yesus, /e jin ta Ya/ gi a'di jin Cayaa/ e ki Ca jin ta'da Arumgimis mo? Aha/ kana /e gwo mo ka Arumgimis mo ki: Dhalku/ ki 'kosh aha/ is ka nyor mo.

<sup>8</sup> Haali/ a'di ki o a'di gwo mo ki: Piyi ka pije/ 'peni wathi/ mo, /e jin tana rum thus jin nyo/o'd kan mo.

<sup>9</sup> Dhala Yesus ki dot a'di gway mo mmo/o gwo mo ki: /E yuku gway kaja mo? A'di ki thok gwo mo ki: Gway pem yuku Karis mo haali/ aman 'kona ka ris mo be.

<sup>10</sup> Dhali a'di ki dot a'di gwo ka daran du mo mmohash uni ka pije/ 'peni bampa/ mo be.

<sup>11</sup> Dhala dhana waambuhany k̄uthar uni shwakin mo e 'bambala wosh mo be.

<sup>12</sup> Dhali uni dotki a'di bway mo mmo/o gwo mo ki: Hashki aman mo e bwan k̄uthar mo ma. Dhalki

aman cika e uni mo.

<sup>13</sup> Wakan a'di ki dhal uni bway mo mmo/ii mo be. Dhala rum thus kun nyo/on pu'dkin ka pije/ mo dhali ciç mo e bwan kuthar mo. Dhala dhana buhany kuthar denkunu e ka alaapi su/ mo, mmosokina uni ka lungu'b eya gap yi'den 'kulga/ mo e bwam yi'de/ mo dhali uni loskina yi'de/ mo be.

<sup>14</sup> Dhali imanhil kuthar uni sokin mo dhali tor gwo e 'penkuman bampa/ mo dhali e pa 'baar mo. Dhali 'kwani pu'dkin mo mmopar a'di e mo a'di jin miiki'd mo be.

<sup>15</sup> Dhali uni pu'dkina Yesus mo dhali uni ki par wathi/ jin bu'thkin ma ruma 'cesh e mo mmoça'b mo ki burrine/ i is mo dhali ka dum piti jin 'boro'd mo be dhali wathi/ jin taki'd ga ruma 'cesh ka ris mo tani dhali uni ko/ki a'di mo be.

<sup>16</sup> Dhali uni gwansan kun mishki a'di mo tani uni tor ki gwo mo gom a'di jin miikunu mo gom wathi/ jin bu'th ma ruma 'cesh mo dhali gwo gom kuthar mo.

<sup>17</sup> Dhali uni telki mii 'pen mo mmoyuka Yesus mo mmoya mo 'peni mom buni mo be.

<sup>18</sup> Dhali me'd jin jithirkina a'di mo e bwam ma kur mo tani wathi/ jin bu'thkin ma ruma 'cesh a'di dotki a'di 'twa/ mo ki a'di midi 'taki nyak di ki a'di mo be.

<sup>19</sup> Hila Yesus ushki'd mo dhali o a'di gwo mo ki: Yaku/ bway pa mo e imugum pini mo ma dhali tor uni gwo gom to jin miikina Tapa gom /e mo dhali gom momiimii jin miikunu apo/ /e mo be.

<sup>20</sup> Dhali a'di yaki'd ka pije/ mo dhali tel mii 'pen mo mmo tor gwo eya tente/ e Bampa/ gi Pan

Dekapolis mo gom dhan to jin miikin ma Yesus gom a'di mo, dhali aris 'kwani 'baar mo merkin mo be.

*'Bwa/ ma Yaa/irus dhala 'Bom jin Taki'da Yesus 'Twaman Burrinyem Piti Is ki Me'd mo*

<sup>21</sup> Dhali ka Yesus 'cithki'da gap dok/e eya kur ki 'bana kamu/ mo tani awaambuhany 'kwani caaca tulki isi a'di mo. Dhali a'di diki'd e shemen ma gap ma al mo.

<sup>22</sup> Dhali yan'ko'd tapan kamu/ gi gu'b gi montul is pu'dki'd mo, a'di jin yukunu gway ka Yaa/irus mo. Dhali ki a'di parki a'di e mo tani a'di bitki'da 'ceshi sho'k piti mo be.

<sup>23</sup> Dhali mmonap a'di mo mmo/o gwo mo ki: Ari 'bwa/m pem a'di 'ba'thki'd mo mmomuri wu mo. Yayu/ mo ma dhali kar me'd pini apowa yim mo. Wakan ka yim mina isi 'bor mo dhali di ki e mo be.

<sup>24</sup> Dhali a'di yaki'd mo nyakki a'di mo.

Dhala dhana waambuhany 'kwani caaca bathki a'di mo dhali uni ki 'kam a'di ki dek mo.

<sup>25</sup> Dhali a'boma kamu/ diki'd si'da/ mo, a'di jin guskin ma bas ki yil 'kume'd i'ce'dka su/ mo be.

<sup>26</sup> Dhali a'di 'koshkina is ka nyor kagahara mo gom mii jin yakina a'di i ihakiim ka ris mo. Dhali a'di ki 'baara ris to 'baar mo kun takina a'di mo be dhali isa kamu/ yisa 'borki'da, hili isa nyor 'curki 'pen ki shi/ mo kagahara mo be.

<sup>27</sup> Dhali ayim cikki gwo kun okunu goma Yesus mo dhali a'di pu'dki'di 'ko'di a'di mo e bwaman ma waambuhany 'kwani mo dhali ta a'di burrinyem piti is ki me'd mo.

28 Haali/ ayim ki o gwo mo ki: Wakki/ aha/ mina 'taki ta isi burrinyem piti is ki me'd mo tani aha/ mina isi 'bor mo be.

29 Dhali ki jahanne/ abas jin guski a'di dakki'd mo, dhali ayim mishki'd ki is piti mo ka yim waçkunu mo 'peni 'ba'th jin 'koshki a'di mo be.

30 Dhala Yesus nyithki'd ki is piti ki mom'bi'th yaki'd 'peni a'di mo dhali ki jahanne/ a'di ki tuka bor mo e bwaman ma waambuhany 'kwani mo dhali o gwo mo ki: Kaja ta aha/ burrinye/ is ki me'd mo?

31 Dhali imancik a'di gwo ki o a'di gwo mo ki: / E parkina waambuhany 'kwani e yapkina yap ki is mo mmo'kam /e mo dhali ata ona /e ki: Kaja ta aha/ is ki me'd mo?

32 Dhali a'di ki hil mo ki e mo mmopar a'di jin miiki'd kan e mo be.

33 Hila 'bom a'di mishki a'di jin miikunu mo gom a'di mo. A'di pu'dki'd ki monko/ is mo dhali mondee is mo dhali a'di ki bita 'cesh ibwambori a'di mo dhali a'di ki tor a'di gwoŋ gana/ 'baar mo.

34 Dhali a'di ki owa yim gwo mo ki: 'Bwa/m pem, mongam gwo is pini a'di waçki /e mo. Yaku/ mo ki monku'th is mo dhali waci mo 'peni 'ba'th pini jin 'koshki /e mo.

35 Dhali ki a'di di'd mmotor gwo mo tani 'kwanin tiya pu'dkin mo 'peni gu'b gi tapa mo, uni gun o gwo mo ki: 'Bwa/m pini wuki'd mo. Atinta tu/ ulkina /e amantor gwo ki gwo ki rash rash kan mo?

36 Hili a'di tonki'd mo gom gwo jin okina uni mo. Dhala Yesus ki o tapa gi gu'b gi montul is gwo mo ki: Dhalku/ is ki ko/ mo ma. Hili gami jasi gwo is mo.

<sup>37</sup> Dhali a'di diki dhal jan tal 'denj kamu/ bway mo mmobath a'di mo, hili isi ciki/ jasa Buterus mo dhala Yakuub mo dhala Yohaana jin ta'da kam ma Yakuub mo be.

<sup>38</sup> Ki uni pu'dkin mo e gu'b gi tapa gi gu'b gi montul is mo tani a'di parki'da dulatt e mo jin miikunu mo dhali 'kwani mmoko mo dhali mmomiya cinthar kagahara mo.

<sup>39</sup> Dhali ki a'di ciki gu'b mo tani a'di ki o uni gwo mo ki: Atinta miikina uma dulatt mo dhali ko mo kan? A'ci a'di yisa wu'd mowa, hili a'di ishki e mo be.

<sup>40</sup> Dhali uni ki pe'th a'di mo. Hili a'di ki dhu uni 'peni 'baar ka piye/ mo dhali a'di ki sus jasi com ma 'ci mo dhali kum mo dhali uni gwansan kun nyakki 'ko ki a'di mo dhali ii bway bwan gu'b e mo jin din ma 'ci mo.

<sup>41</sup> Dhali a'di ki butha yim ki me'd mo dhali a'di ki owa yim gwo mo ki: Talitha kumi, a'di jin ta 'pemen gwo jin onu ki: Ari nyara/, aha/ ona /e gwo mo ki: cuyi mis mo.

<sup>42</sup> Dhali ki jahanne/ ari nyara/ cuki mis mo dhali ya ki sho'k mo. Haala yim 'kona yili 'kume'd i'ce'dka su/ mo. Dhali ki jahanne/ uni 'baar mo 'kokunu mo mmotash ki momer mo be.

<sup>43</sup> Dhali a'di ki kan uni gwo ki 'bi'th mo ki wathinj kamu/ midi 'taki diki mish mii yan mo. Dhali a'di ki tor uni gwo mo mmoçi ka yim tonte/ mmoshwa mo be.

## 6

*Yesus A'di Wakunu mo e Pa Naasira mo*



<sup>1</sup> A'di yaki'd mo 'peni mun mo dhali pu'd mo e bampam piti mo dhali imanciƙ a'di gwo bathƙi a'di nsho'k mo be.

<sup>2</sup> Dhali ka cim ma pesu/ mo tani a'di ki tel mii 'pen mo mmoƙor uni gwo mo e gu'b gi montul is mo. Dhali 'kwani ka ris kun cikƙi gwom piti mo tani uni 'kokin mo mmomer mo mmo/o gwo mo ki: 'Peni mana sa/ igamkina wathi/ yansan aris mii gwansan mo? Ki moyukƙ jin ta'da ta sa/ icikunu a'di mo? Dhali adhan mom'bi'th maja sa/ imiikina a'di mii gwahan ki me'd piti mo?

<sup>3</sup> Dina a'di ki ta amanpa/ cwa 'taa? Dhali dina a'di ki ta ya/ ma Mariyam 'taa? Dhali ikam piti 'koki ta iYakuub mo dhala Yusi mo dhali Yahuuda/ mo dhala Simaan 'taa? Dhali 'kona i'bwaham piti ki nyakƙ 'ko ki ana imahana? Dhali uni kolkunu ki a'di mo be.

<sup>4</sup> Dhala Yesus ki o uni gwo mo ki: Amanci gwo ma Arungimis yisa dar gi taƙ e mon tiya hili isi ciki/ jasi e bampam pitiƙ gana/ mo dhali e bwaman ma bas 'kwanim piti mo dhali e gu'b pitiƙ gana/ mo be.

<sup>5</sup> Dhali a'di mol dhan miiny caaga/ mii mo isi ciki/ a'di kar me'd piti apo/ 'kwani kun 'bathan ki daka/ mo dhali a'di ki waƙ uni mo be.

<sup>6</sup> Dhali a'di merki'd kagahara mo haali/ gom 'kom buni jin 'kona uni ki dar gi monƙam gwo is mo be.

Dhali a'di yaki'd mo e bwaman 'kwani e bampa/ 'baar mo mmoƙor gwo mo be.

*Mo/ii jin Iina Uni 'Kume'd I'ce'dka Su/ mo*

<sup>7</sup> Dhali a'di ki yuk 'kwani 'kume'd i'ce'dka su/nyakki a'di mo, dhali a'di ki tel mii 'pen mo mmo-hash uni ka susu/ susu/ mo. Dhali ci uni moshirr apowa rum thus kun nyo/on mo be.

<sup>8</sup> A'di ki kan uni gwo mo mmo'koki 'do ton tiya gom iim buni i bway mo hili isi ciki/ jasi cwa mo, walla maa yisa, walla kucan yisa, walla guurush yisa eya jisalaan buni mo.

<sup>9</sup> Hili uni mini hi'th jasa ppa/ isho'k mo dhali mini 'koki hi'th burrinyem bwamani su/ mo.

<sup>10</sup> Dhali a'di ki o uni gwo mo ki: E gu'b yin jin mina umi ciç mo tani 'koyi mo ntagi um mini dhal mo yan 'pen mo.

<sup>11</sup> Dhali wakki/ 'kwani gi mo caan 'koki bu'th um mo, dhali ush gwo cik 'peni um mo tani dhali ki um mini dhal mo yin 'pen mo tani piri abuhany 'peni sho'k bum mo haali/ a'di midi ta gwo jin onu apo/ uni mo be.

<sup>12</sup> Wakan uni iikin mo dhali ci gwo mo ki 'kwani mini 'taki rica du is mo be.

<sup>13</sup> Dhali uni urkina ruma 'cesh ka pije/ ka ris mo dhali wol uni ayini 'kup ka ris mo, aris uni gun 'ba'thkin mo dhali waç uni mo be.

### *Mowu ma Yohaana jin Ta'da Manmiiya Mii ki Yi'de/mo*

<sup>14</sup> Dhala Malik Hirodus cikki gwo mo gom a'di mo, gom gway ma Yesus mishkunu e mo 'baar mo. Gom kun tiya o gwo mo ki: A'di ta'da Yohaana jin ta'da manmiiya mii ki yi'de/ mo jin cukunu mis mo 'peni mowu mo. A'di 'bitha wathi/ mii ki 'bi'th e a'di mo be.

<sup>15</sup> Hili kun tiya o gwo mo ki: A'di ta'da Iliyya mo. Dhali kun tiya o gwo mo ki: A'di ta'da mançi gwo

ma Arumgimis mo jin wana e gi jin tal 'denj kamu/ 'peni imanci gwo ma Arumgimis kadhamo/ mo be.

<sup>16</sup> Hili ka Hirodus cikki gwo mo gom a'di mo tani a'di ki o gwo mo ki: AYoha<sup>h</sup>an jin 'cithka/ 'kup mo a'di cukunu mis mo 'te/ be.

<sup>17</sup> Haala Hirodus a'di hashki gwo mo dhali butha Yoha<sup>h</sup>an mo dhali dek a'di mo mmokara sijin mo gom gway ma Hirodiy<sup>y</sup>a mo jin ta asha kam piti ka Pilibbus mo haali/ a'di mashki'da yim mo be.

<sup>18</sup> Haala Yoha<sup>h</sup>an ki owa Hirodus gwo mo ki: A'di diki ta mii jin dhala gwonkan /e bway mo mmomash asha kan mo be.

<sup>19</sup> Dhala Hirodiy<sup>y</sup>a a'di dikina gwo apo/ a'di mo mmoruk a'di mo dhali nap a'di mmo'taki 'kosh jwa mo tani hili ayim diki mish a'di mii mo.

<sup>20</sup> Haala Hirodus a'di ko/ ki'da Yoha<sup>h</sup>an mo mmomishkina a'di a'di ki a'di ta wathin kar/e mo dhali wathi/ jin kogu mo dhali kar a'di ki 'dantar mo. Ki a'di cikki gwo 'peni a'di mo tani a'di dunkurkina 'kup is kagahara mo dhali a'di di'd mmocik gwo 'peni a'di ki bwan 'kunya/ mo be.

<sup>21</sup> Hili embula 'borga/ pu'dki'd mo ka Hirodus pu'dkin ma cim jin dhodhu a'di mo tani a'di miiki dhan maa gom 'kwani ma hakuuma gi gu'b piti mo dhali imancil ma askar alip mo dhali 'kwani gwanyaka/ gi Pany Jaliil mo be.

<sup>22</sup> Dhali ki 'bwa/ ma Hirodiy<sup>y</sup>a pu'dki'd mo dhali sa mo tani ayim 'borki'da Hirodus bwa mo dhali yilkinam piti mo, dhali malik ki o nyara/ gwo mo ki: Doti aha/ mo ma gom ma to yin jin o /e bwa mo dhali aha/ mina ciki a'di /e mo be.

<sup>23</sup> Dhali a'di ki owa yim gwo is mo mmo/o gwo

mo ki: Ma to yin jin mina /e idot̄ aha/ mo tani aha/ mina çiki a'di/e mo ntagi 'bwanu'b bampam pema kamu/ mo be.

<sup>24</sup> Dhala yim yaki'd ka pije/ mo dhali dot̄ kum gwo mo ki: Ata miga/ dot̄ a'di mo? Dhali kum ki o a'di gwo mo ki: 'Kup ma Yohaän jin ta'da manmiiya mii ki yi'de/ mo be.

<sup>25</sup> Dhala yim yaki gu'b ki jahanne/ mo mmobunburku/ mo eya malik mo dhali dot̄ a'di gwo mo mmo/o gwo mo ki: Aha/ ñapa /e mmoçi aha/ 'kup ma Yohaän shwane'dan e bwam ma sahan mo, a'di jin ta'da manmiiya mii ki yi'de/ mo be.

<sup>26</sup> Dhala malik a'di bitkina bwa ka lungu'b kagahara mo ki bwän diti'd mo. Hili haali/ gom gwo jin ona a'di is mo dhali yilkinam piti mo tani a'di 'tena bwa mmo'ce'd gwom piti goma yim mo be.

<sup>27</sup> Dhali ki jahanne/ a'di hashki'da askar mo, a'di jin ta'da amanji mo mo, dhali kan gwo mo ki 'kup piti minu guyu/ mo. Dhali a'di yaki'd mo dhali 'citha/ Yohaän 'kup mo eya sijn mo

<sup>28</sup> dhali guyu/ 'kup piti mo e bwam ma sahan mo dhali çiki a'di ki nyara/ mo, dhali nyara/ ki çiki a'di ki kum mo be.

<sup>29</sup> Dhali ki imancik a'di gwo cikki gwo mo gom a'di mo tani uni pu'dkin mo dhali kal buñgwar is piti mo dhali 'thi a'di e jis wosh mo be.

*'Kwani Alaapi Mudhe'd kun Çikunu Tont̄e/ mo*

<sup>30</sup> Dhali imandhun ma Yesus ki she/ mo uni dokkin mo ka nyan'ko'd eya Yesus mo dhali tor a'di aris gwo 'baar mo kun miikina uni mo dhali aris gwo kun torkina uni mo be.

<sup>31</sup> Dhali a'di ki tor uni gwo mo ki: Iiyi mo um 'cena mo e mo jin pina 'kwani mo dhali siyi is mo

ari'ceenne/. Haali/ 'kwani tana ris ka ris pu'dkin mo dhali iikin mo, dhali uni 'koki butha tente/ mo mmokar toŋ kamu/ n'twa/ mo mmoshwa mo be.

<sup>32</sup> Dhali uni iikin mo e bwam ma kur mo e mo jin dar gi 'kwani uni 'cena ki is buni mo be.

<sup>33</sup> Dhali 'kwani ka ris parki uni e mo mmo/ii mo dhali mish uni mo dhali uni sokin ki sho'k mo 'peni aris bampa/ 'baar mo dhali pu'di twa/a/ ki uni mo be.

<sup>34</sup> Ki a'di thulki'd mo tani a'di parki'da dhana buhany wathimpa e mo dhali a'di ki ko'c uni e i is mo haali/ uni wakina e gi ka'bal kun dar ga manhil uni mo. Dhali a'di ki tel mii 'pen mo mmoŋor uni gwo ki to ka ris mo be.

<sup>35</sup> Dhali ki mo taki'da babalalu/ mo tani imancik a'di gwo pu'dkin mo dhali o a'di gwo mo ki: Mo yansan ta mo jin pina 'kwani mo, dhali mo ta'da 'thintha/ mo be.

<sup>36</sup> Hashki uni mo ma ki uni mini ii bampa/ mo dhali pa kun 'kon gi jin 'kam mo dhali yol tonte/ gom is buni mo mmoshwa mo.

<sup>37</sup> Hili a'di ki thoŋ uni gwo mo ki: Um mini ci uni tonte/ mmoshwa mo. Dhali uni o a'di gwo mo ki: Mina aman ii mo 'te/ be dhali yol maanŋkuthu'd ka riyaal\* iss 'kwanimpa ipe'de/ mo dhali ci uni mmoshwa mo 'taa?

<sup>38</sup> Dhali a'di ki o uni gwo mo ki: Um 'kon ma guraasa ekata mo? Iiku/ mo dhali par e mo ma. Dhali ki uni gamki a'di mo tani uni ki o a'di gwo mo ki: Imudhe'd mo dhali to yi'de/ 'koni su/ mo be.

<sup>39</sup> Dhali yan'ko'd a'di ki kan uni gwo 'baar mo mmo'ko 'pena 'cesh ka pwaŋ she/ mo apowa shon

---

\* **6:37** miyya wa ishriin

dhii/i'd mo.

<sup>40</sup> Wakan uni 'kokina 'cesh ka ṅul 'kup mo ki iss 'kwanimpa ka mummudhe'd mo dhali ki iss su/i'ce'dka 'kume'd mo be.

<sup>41</sup> Dhali a'di ki bu'th maanḵuthu'di mudhe'd mo dhali to yi'de/ isu/ mo tani dhali a'di ki hil 'kup ki momis mo dhali a'di ki 'bora 'bor bwa i is mo dhali 'ce'd maanḵuthu'd bwa mo dhali a'di ki ci uni ki imancik a'di gwo mo mmodhu ibwambori 'kwani mo. Dhali a'di ki pwaḵ to yi'de/ isu/ bwa mo mbwaman uni 'baar mo.

<sup>42</sup> Dhali uni 'baar mo shwakin mo dhali kapkunu mo be.

<sup>43</sup> Dhali uni 'tu'dkina nura/ ka 'kume'd i'ce'dka su/ mo ki 'pisira/ maa mo dhali to yi'de/ mo be.

<sup>44</sup> Dhali uni gwansan kun shwaki maanḵuthu'd mo tani ta 'kwanij gwasi alaapi mudhe'd mo be.

### *Yesus Ya ki Sho'k e 'Kupa Al Yi'de/ mo*

<sup>45</sup> Ki jahanne/ a'di ki tor imancik a'di gwo gwo mo mmose bwam ma ḵur mo mmo/ii itwa/a/ ki a'di mo e 'bana gapa kamu/ mo e Pam Beetsayda mo ki a'di midi 'cuḵka waambuhany 'kwani montul is mo be.

<sup>46</sup> Dhali ṅ'ko'd ki a'di dhalki uni 'pen mo tani a'di seki moṅ'kuwosh mo dhali 'tho mo be.

<sup>47</sup> Dhali ki mom'pimpili/ pu'dki'd mo tani aḵur a'di diki'd isi bwaman ma al mo dhali a'di di'd a'di 'de/ eya 'cesh mo be.

<sup>48</sup> Dhali a'di di'd mmopar uni e ki uni 'kokin ka cis mo e moṅ'kosh yi'de/ is ki cwa mo haala punthar 'tham poshki'da po/ uni mo be. Dhali ki mo ta mon'twash/e mo tani a'di pu'dki'di uni mo

mmoya ki sho'k e 'kupa al yi'de/ mo. A'di ya'd 'taki ya pe uni mo be.

<sup>49</sup> Hili ki uni parki a'di e mo mmoya ki sho'k apo/ 'kupa al yi'de/ mo tani uni toshkin ki a'di ta'da rum mo dhali uni kumki cuuwa/ mo be

<sup>50</sup> haali/ uni 'baar mo parki a'di e mo dhali uni 'kokina isi modee mo. Hili ki jahanne/ a'di torki uni gwo mo dhali o gwo mo ki: Budhi adu mo ma. Aha/ a'dan be. Dhalku/ is ki ko/ mo ma.

<sup>51</sup> Dhali a'di seki'd e bwam ma kur mo nyakki uni mo dhali 'tham doshki'd mo be. Dhali uni 'kokini momer kagahara mo be.

<sup>52</sup> Haali/ uni 'koki mish gwo 'ban mo gom maan'kuthu'd mo haali/ adum buni 'bitha'bi'th mo be.

*Yesus Waçki 'Kwani kun 'Bathan e Pa Jannisaaraṭ mo*

<sup>53</sup> Dhali ki uni 'cithkina gap mo tani uni pu'dkin mo e bampa/ gi Pa Jannisaaraṭ mo dhali uni shi'dkina kur iyana gap mo be.

<sup>54</sup> Dhali ki uni pikin ka pije/ mo 'peni bwam ma kur mo tani ki jahanne/ 'kwani nyithki a'di mo be

<sup>55</sup> dhali uni sokin mo 'peni aris bampa/ 'baar mo mmokukul mo caan is mo dhali tel mii 'pen mo mmokal 'kwani kun 'bathan mo eya cim buni mo e mo 'baar mo jin ciḱa uni gwo ki a'di di'di cine/ mo be.

<sup>56</sup> Dhali e mo yin jin pu'da a'di mo eya ris bampa/ mo dhali e 'pen'kuman bampa/ mo walla e bampa/ mo tani uni ki 'thi uni gun 'bathan e mo ma suug mo dhali o bwa ki a'di mo, ki uni mini 'taki ta a'di isi 'twaman burrinyem piti is ki me'd mo. Dhali

ka ris uni ka ris kun taki a'di is ki me'd mo tani uni  
'kokunu mo mmowaç mo be.

## 7

### *Mii gi 'Kwaniḡ Gwanyjaka/*

<sup>1</sup> Dhali ki 'Kwani Parisiyiin tulki is imontaḡ 'de/  
mo e a'di mo nyaḡki iman'kwar to mo uni gun  
pu'dkin mo 'peni Pa Urushaliim mo tani

<sup>2</sup> uni parki imancik a'di gwon tiya e mo  
mmoshwa to ki me'da nyo/ ga/ mo mmo'koki  
'thur uni ki yi'de/ mo be.

<sup>3</sup> (Haali/ 'Kwani Parisiyiin dhali aris 'Kwani  
Yahuuda/ mo tani uni 'koki shwa to wakan mo, hili  
isi ciki/ uni mini 'thur me'd buni mo mmobotki mii  
gi 'kwani gwanyjakam buni kadhamo/ mo be.

<sup>4</sup> Dhali ki uni pu'dkin 'peni mo ma suug mo tani  
uni si'da/ 'koki shwa to mo hili isi ciki/ uni mini  
mii nyon is buni mo dhali miin tiya ka ris si'da/  
miikina uni mo gom miin dhamo/ kun toḡkunu uni  
mo mmomii mii mo mmolama kubbaaya mo dhala  
nos mo dhali toḡ'kul bwa kun ta gurany kush mo.)

<sup>5</sup> Dhali 'Kwani Parisiyiin dhali iman'kwar to mo  
dotki a'di gwo mo ki: Katintaye i'kona imancik /e  
gwo ki bath mii gi gwoḡ gwanyjakaḡ dhamo/ mo,  
hili uni shwa to ki me'd kun nyo/anyo/ kan mo.

<sup>6</sup> Dhali a'di ki o uni gwo mo ki: Nye, din ma  
Ishaya ki o um gwo is ki um tana he'k e ka he'k e  
mo me'd gwo jin 'kwarkunu mo ki:

'Kwani gwansan uni tak aha/ ki 'twam buni mo  
tani

hili adum buni si'dasi'd 'peni aha/ mo be.

<sup>7</sup> Uni ki luḡ aha/ ki pe'th mo



gwoṅkan 'peni 'kwani mo tani tora uni me'd gwoṅ  
gana/ mo be.

8 Um dhalki gwoṅkan ma Arumgimis mo dhali  
bu'th gwoṅ 'kwanin dhamo/ ki nyen ka bor mo.

9 Dhali a'di ki o uni gwo mo ki: Um 'dapa'dap  
kagahara mmo/ush gwoṅkan ma Arumgimis mo  
jin mina um dhu gwoṅ 'kwanin dhamom bum mo.

10 Haala Musa o gwo mo ki: Taḳi icim dhali  
ikwan mo, dhali, A'di jin midi o gwoṅ thus apo/  
com mo walla kum mo tani dhalki a'di ka jinḡ gana/  
iwu'd mo.

11 Hili um o gwo mo ki: Waḳki/ wathi/ midi tor  
com gwo mo walla kum ki a'di jin mina /e 'taki gam  
'peni aha/ mo tani midi ta Kurbaan mo (a'di jin ta  
'pemen jin onu ki: A'di jin cikunu Arumgimis mo  
be) -

12 dhali yan'ko'd um 'koki dhal a'di bway mo  
mmomii ari toṅ kamu/ tal 'de/ gom com mo walla  
kum mo be.

13 Wakan um ki puu gwo ma Arumgimis mo gom  
gwo gi gwoṅ 'kwanin dhamom bum mo a'di jin  
luka um mo. Dhali um ki miya ris ton tiya gi  
wakan mo be.

### *To gi Shi/i Wathi/ Is mo*

14 Dhali a'di ki yuk 'kwani i a'di mo dok/e dhali  
o uni gwo mo ki: Ciki gwo 'peni aha/ mo ma, aris  
umi 'baar mo dhali mishi gwo 'ban mo ma.

15 Toṅ kamu/ yisa di'da jin di'd 'pena piye/ jin  
midi ya bwa wathi/ mo dhali shi/ a'di is mo, hili  
a'di jin piyi'd ka piye/ 'peni bwa wathi/ mo tani a'di  
shi/ki a'di is mo be.

16 Waḳki/ wathiṅ kamu/ ta gi gu'ban'ce mo  
mmocik gwo mo tani dhalki a'di cik gwo mo ma.

17 Dhali ki a'di ciḱki gu'b mo tani dhali dhal 'kwani mo tani imanciḱ a'di gwo dotki a'di gwo mo gom gwom 'bi'th/e yan mo be.

18 Dhali a'di ki o uni gwo mo ki: A/ki um si'da/ 'kokin kan mo mmo'koki mish gwo 'ban mowa? 'Kona um ki mish 'taa ki ma to yin jin yaki'd e bwa wathi/ 'pena pije/ mo tani midī mol shi/ a'di is mo be

19 haali/ a'di diki seya dum piti mo hili e bwam piti mo dhali wakan a'di ki ya ka pije/ mo. (Wakan a'di torki gwo eya tente/ ka ris tonṭe/ 'baar mo ta kun dhelelkin mo be.)

20 Dhali a'di ki o gwo mo ki: To jin piyi'd ka pije/ 'peni 'twa/ wathi/ mo tani a'di ishi/ki a'di is mo be.

21 Haali/ 'peni bwaman mo, 'peni bwaman ma du wathi/ mo tani a'di pu'dkina gwon thus kun kulumu ibwa kun shi/ashi/ mo, kun ta mii gun miinu miinycal mo, dhali mmota 'di/ mo dhali mmo'kosha mee mo dhali mmota cal mo

22 dhali mmo'thoth bwa mo dhali mmomii mii kun 'coḱa'coḱ mo dhali mmota he'k e mo dhali mii kun 'kanuwa kanthi/ mo dhali miin dhapan mo dhali mmota imanthutha thu'th 'pen mo, mmodhu 'ba/ ki ca mo dhali mii jin miinu miim pus mo.

23 Aris tonthus gwansani 'baar mo kun pikin ka pije/ 'peni bwa wathi/ mo tani uni a'di ishi/ki wathi/ is mo be.

### *Moṅgam Gwo Is ma 'Bom gi Pam Pinikiyya ma Suriyya mo*

24 Dhali a'di cuki mis mo 'peni mun mo dhali ya mo e bampa/ gi Pan Sur mo dhali Pan Saydaa/ mo. Dhali a'di ciḱki gu'b mo dhali a'di diki dhal jan 'den

kamu/ bway mo mmomish a'di mo. Hili a'di molu bag mo be.

<sup>25</sup> Hili ki jahanne/ a'boma kamu/ a'di jin bu'thkin ma rum thus jin nyo/o'd 'bwa/ mo cikki gwo mo gom a'di mo, dhali a'di pu'dki'd mo dhali ca'bki jin 'kupa'dupuni shoki a'di mo be.

<sup>26</sup> A'bom yansan ta'da 'bom gi Pan Griki mo be, a'di jin dho'thkunu mo e Pam Pinikiyya ma Suriyya mo. Dhala yim dotki a'di gwo mo mmo/ura ruma 'cesh ka pije/ 'peni 'bwa/ mo be.

<sup>27</sup> Dhali a'di ki owa yim gwo mo ki: Dhalki uci cinu tonte/ mmoshwa ntwa/a/ mo, haali/ a'di diki 'bor mo mmokal tonte/ 'peni uci mo dhali ta'k a'di ka 'ka mo.

<sup>28</sup> Hila yim thokki a'di gwo mo ki: Nye, Tapa, hili a'ka si'da/ uni mini shwa kuluny maa uci kun raskin 'pena tharabeesa mo be.

<sup>29</sup> Dhali a'di ki owa yim gwo mo ki: Gom gwo jin ona /e wakansan mo tani yaku/ /e mo. Aruma 'cesh dhalki 'bwa/um pini 'pen mo be.

<sup>30</sup> Dhali ayim yaki pa mo dhali gama 'ci mmo/ish eya ci mo dhali aruma 'cesh dhalki a'di 'pen mo be.

*Yesus Wacki Wathi/ jin Ta'da 'Diye/ mo dhali jin Moli 'Twa/ Wal mo*

<sup>31</sup> Dhali yan'ko'd a'di dokki'd ka nyan'ko'd mo e Pan Sur mo dhali yaki tur mo e Pan Saydaa/ mo eya Al ma Jaliil mo dhali ki tur mo e bampa/ gi Pan Dekapolis mo be.

<sup>32</sup> Dhali uni kalki a'di wathi/ jin ta'da 'diye/ mo dhali 'twam piti jin cumpulkina a'di wal mo. Dhali uni napki a'di mo mmokar me'd piti apo/ a'di mo be.

<sup>33</sup> Dhali uni ki kal a'di 'pen ka pije/ mo 'pena waambuhany 'kwani mo, a'di 'de/ mo. A'di ki kar me'd piti e bwany'cem piti mo, dhala Yesus ki 'tak manya/ mo dhali ta a'di ale'd piti is ki me'd mo be.

<sup>34</sup> Dhali a'di ki hil mo 'kup ki momis mo dhali wuwa shure/ mo dhali o a'di gwo mo ki: Ippatha, jin ta 'pemen jin onu gwo mo ki: Dhalki a'di ka'du mo ma.

<sup>35</sup> Dhali 'cem piti ka'dkunu mo dhala le'd piti 'cukkunu mo dhali a'di ki o 'twa/ eya tente/ mo be.

<sup>36</sup> Dhali a'di ki kan uni gwo mo mmo'koki tor jan tal 'dej kamu/ gwo mo gom gwo yan mo. Dhali hili mmokankina a'di uni gwo ki 'bi'th ki nyanye/ mo tani wakan uni torki gwo ki bwa gom a'di ki nyanye/ eya tente/ mo be.

<sup>37</sup> Dhali uni 'kokin mo mmomer ki mer jin shiyi'd mo mmo/o gwo mo ki: A'di miiki'da ris to gwansan ki 'bore/ mo. A'di ka'dki wathi/ jin ta'da nape/ 'ce mo mmocik gwo mo dhali uni gun mol 'twa/ wal mishki 'twa/ wal mo be.

## 8

### *'Kwani Alaapi Donjon kun C̣ikunu Tonṭe/ mo*

<sup>1</sup> Dhali ka tee gwansan ka dhana waambuhany 'kwani tulki is dok/e mo dhali uni dar gi tonṭe/ mo mmoshwa mo tani a'di ki yuk imancik a'di gwo mo e a'di mo dhali o uni gwo mo ki:

<sup>2</sup> Aha/ ko'ckina adhana waambuhany 'kwan-impa e i is mo haali/ uni 'koni aha/ shwane/ ka cimi kwara mo dhali dar gi tonṭe/ mmoshwa mo be.

<sup>3</sup> Dhali wakki/ aha/ mina hash uni bway pa ki te/ mo e bampam buni mo tani uni mina buye/ i'thi

mo i bway mo. Haali/ kun tiya iiyin 'peni pa kun si'dasi'd mo be.

<sup>4</sup> Dhali imancik a'di gwo thokki a'di gwo mo ki: Adhana waambuhany 'kwani minu ci tonte/ mmoshwa e bwam ma si'b imahan 'peni mana mo?

<sup>5</sup> Dhali a'di ki dot uni gwo mo ki: Um 'kona maankuthu'd ekata mo? Uni ki thok a'di gwo mo ki: Ipesu/ mo be.

<sup>6</sup> Dhali a'di ki kana dhana waambuhany 'kwani gwo mo mmo'ko 'pena 'cesh mo. Dhali a'di ki bu'th maankuthu'd ipesu/ mo dhali ki a'di ciki mo jin 'boruwa 'bor bwa i is mo tani a'di ki 'ce'd uni mo dhali ci uni ki imancik a'di gwo mo mmodhu abori 'kwani mo. Dhali uni dhuki uni ibwambor ma waambuhany 'kwani mo be.

<sup>7</sup> Dhali uni tan gi ushi to yi'de/ idaka/ mo. Dhali ki a'di 'borki'da 'bor bwa i is mo tani a'di kanki uni gwo mo ki uni gwansan si'da/ minu 'taki dhu ibwambori uni mo be.

<sup>8</sup> Dhali uni shwaki uni mo dhali uni 'kokunu mo mmokap mo. Dhali uni tulki kuluny maa is kun urki 'kup mo mmo'tu'da nura/ ipesu/ mo be.

<sup>9</sup> Dhali uni gwansan kun 'kokin mo mmoshwa a'di mo tani wakina e gi 'kwani alaapi donon mo be.

<sup>10</sup> Dhali a'di ki hash uni mo dhali ki jahanne/ a'di seki bwam ma kur mo nyakki imancik a'di gwo mo dhali uni iikin mo e bampa/ gi Pan Dalmanutha mo be.

### *Mmo/o Bwa ki Par Jamas Mii E mo*

<sup>11</sup> Dhali 'Kwani Parisiyiin pu'dkini a'di mo dhali telki mii 'pen mo mmogar a'di gwo 'kusi 'twa/

mo mmonap jamas mii 'peni a'di 'peni momis mo mmopal a'di mo be.

<sup>12</sup> Dhali a'di wuki'da shure/ kagahara mo e shi/ in piti mo dhali o gwo mo ki: Atinta nap ma nyakum yil 'kwani gwansan jamas mii mo? Ka jin gana/ aha/ tora um gwo mo ki: Jamas miinj kamu/ yisa minu ci um 'kwani ma nyakum yil gwansan mo.

<sup>13</sup> Dhali a'di ki dhal uni 'pen mo dhali se i bwam ma kur dok/e mo. A'di ki 'citha gap gi 'bana kamu/ mo be.

### *Acumat gi 'Kwani Parisiyiin mo*

<sup>14</sup> Dhali uni naki maankuthu'd mo mmo'koki guyu/ mo. Dhali uni tan gi jasi jin tal 'dej gana/ jin takina uni mo e bwam ma kur mo.

<sup>15</sup> Dhali a'di ki rum uni ki gwo mo mmo/o gwo mo ki: 'Cunycuri miim bum ki 'bore/ mo dhali jiyi acumat gi 'Kwani Parisiyiin ki e ki 'bore/ mo dhali acumat gi 'Kwani Hirodusiyyiin mo.

<sup>16</sup> Dhali uni su'kkin ki gwo ka rem 'kup mo mmo/ o gwo mo ki: Ana dara gi maankuthu'd mo be.

<sup>17</sup> Dhala Yesus nyithki gwom buni mo dhali o uni gwo mo ki: Atinta su'kkina um ki gwo mo gom maankuthu'd jin piyi'di um kan mo? 'Kona um ki nyith mo 'taa? Walla 'kona um ki mish gwo 'ban mo? Adum bum 'bitha'bi'th mo kana?

<sup>18</sup> Um tan gi e mo dhali 'kona um ki mish mo mo? Dhali um tan gi 'ce mo dhali 'kona um ki cik gwo mowa? Dhali 'kona um ki ka gwo e mowa?

<sup>19</sup> Ki aha/ 'ce'dkina maankuthu'di mudhe'd mo gom 'kwani alaapi mudhe'd mo dhala nura/ ekata i'tu'dkina um ki kuluny maa kun uri 'kup mo? Uni ki thok a'di gwo mo ki: I'kume'd i'ce'dka su/ mo be.

<sup>20</sup> Dhali maan<sub>k</sub>uthu'di pesu/ gom 'kwani alaapi donjon mo tani anura/ 'tu'dkina um ekata ki kuluny maa kun tulkina um is mo? Dhali uni ki thok a'di gwo mo ki: Ipesu/ mo be.

<sup>21</sup> Dhali a'di ki o uni gwo mo ki: Dhali 'kona um ki mish gwo 'ban naskina/ mowa?

*Wathiny Ja'da/ jin Waçkunu mo e Pam Beetsayda mo*

<sup>22</sup> Dhali uni pu'dkini Pam Beetsayda mo. Dhali 'kwanin tiya suski wathi/ i a'di mo, a'di jin ta'da ja'da/ mo dhali ñap a'di mo mmota a'di is ki me'd mo be.

<sup>23</sup> Dhali a'di ki sus wathi/ jin ta'da ja'da/ ki me'd mo, dhali a'di ki sus a'di ka piije/ 'peni pa mo. Dhali ki a'di takki manya/ i em piti mo dhali sus a'di ki me'd piti mo tani a'di ki dot a'di gwo mo ki: /E mishi toj kamu/ par e mo 'taa?

<sup>24</sup> Dhali a'di ki hil 'kup ki mis mo dhali o a'di gwo mo ki: Aha/ mishkina 'kwani mo. Hili uni wakina e gi cwa kun iikin mo 'te/.

<sup>25</sup> Dhali yan'ko'd dok/e a'di ki sus a'di ki me'd piti mo dhali kar me'd piti apo/ em piti mo. Dhali a'di hilki'da hil ki dha'k mo dhali waç mo dhali a'di mishki'da ris to 'baar mo eya tente/ mo be.

<sup>26</sup> Dhala Yesus ki hash a'di bway gu'b piti mo mmo/o gwo mo ki: Dhalku/ ki ciç bampa/ mo.

*Buterus A'di Torki Mii eya Tente/ goma Yesus mo*

<sup>27</sup> Dhala Yesus nyak ya ki imanciç a'di gwo mo e bampa/ gi Pañ Kaysariyya mo e Pam Pilibbi mo. Dhali e bway tur jin iina uni mo tani a'di ki dot imanciç a'di gwo gwo mo ki: Ki 'kwani on ki aha/ tana aja mo sa/?

28 Dhali kun tiya ki tor a'di gwo mo ki: Ka Yoha<sup>an</sup> jin ta'da manmiiya mii ki yi'de/ mo ti. Dhali kun tiya o ki: Iliyya mo, dhali kun tiya o ki: Jan tal 'de/ 'peni imanci gwo ma Arumgimis kadhamo/ mo be.

29 Dhali a'di ki thok uni gwo mo ki: Hili idhali um onki aha/ tana aja mo sa/? Bu<sup>terus</sup> ki thok a'di gwo mo ki: /E tana Kristhos mo be.

30 Dhali a'di ki kan uni gwo mo mmodiki tor jan tal 'de<sup>n</sup> kamu/ gwo gom a'di mo be.

*Yesus Torki Wum Piti Itwa/a/ mo*

31 Dhali a'di telki mii 'pen mo dhali tor uni gwo mo ki Ya/ gi 'Kwani mina isi 'kosh ka nyor mo gom to ka ris mo dhali mina 'kwanin gwanyjaka/ iwak mo dhali igasiis kun can mo dhali iman'kwar to mo, dhali a'di minu 'kosh jwa mo, dhali 'ko'da cim kwara mo tani a'di midi cuyi mis dok/e mo be.

32 Dhali a'di o gwo yansan eya thithin thith gana/ mo. Dhala Bu<sup>terus</sup> ki bu'th a'di mo dhali tel mii 'pen mo mmokucur a'di ki gwo mo be.

33 Hili a'di tu'kki'da bor mo dhali hil imancik a'di gwo mo tani a'di ki kucura Bu<sup>terus</sup> ki gwo mo dhali o gwo mo ki: Se<sup>taan</sup>, yaku/ i'ko'di aha/ mmun mo ma. Haali/ /e diki di ki 'ban ma Arumgimis mo hili /e din ka 'ban gi 'kwani mo be.

34 Dhali a'di ki yuk uni i a'di mo awaambuhany 'kwani nyakki imancik a'di gwo mo dhali o uni gwo mo ki: Wa<sup>kki</sup>/ wathin kamu/ midi yayu/ ibath aha/ nsho'k mo tani dhalki a'di non is pitin gana/ mo dhali 'de'k cwany'cithan dhul piti mo dhali bath aha/ nsho'k mo.

35 Haali/ gom a'diyin jin midi 'taki wo<sup>th</sup> mondiki/ em piti mo tani midi this a'di e mo. Dhali a'diyin jin midi this mondiki/ em piti e mo



gom gway pem mo tani dhali gom gway gi gwom 'borga/ mo tani midi woth a'di mo be.

<sup>36</sup> Haali/ gwo gi wakataye jin nyo/a wathi/ mo wakki/ a'di midi gam to 'baar mo e mony'cesh mo dhali lo'b mondiki/em piti mii nycine/ mo?

<sup>37</sup> Haali/ wathi/ midi mish wan mondiki/em piti 'ba/ kata mo?

<sup>38</sup> Haali/ a'diyin jin mina isi 'theya'the mo gom aha/ mo dhali gom gwom pem mo e bwaman uni gwansan kun tana nyakum yil kun ta imanmii miinycal mo dhali imanmii miinthus mo tani Ya/ gi 'Kwani si'da/ a'di mina isi 'theya'the mo gom a'diyin mo ki a'di midi pu'du/ mo e monyca gi com mo dhali nyakki iman'doyu gwom piti kun kogu ilu/ mo be.

## 9

<sup>1</sup> Dhali a'di ki o uni gwo mo ki: Ka jin gana/ aha/ tora um gwo mo ki: Kun tiya 'kokin mo mmodoshi mahan mo kun mini 'koki nyok wu mo ntwa/ a/ ki uni 'koki par Bampa/ ma Arumgimis e mo mmopu'du/ ki mom'bi'th mo be.

### *Mmowarkin ma Yesus Jamas Piti mo*

<sup>2</sup> Dhali 'ko'da cim pe'de/ mo tani Yesus ki susa Buterus nyakki a'di mo dhala Yakuub mo dhala Yohaana mo, dhali sus uni bway 'kuwosh jin turatur uni 'cena mo. Dhali a'di ki war is piti ibwam-bori uni mo be.

<sup>3</sup> Dhali burinyem piti ca'bki 'be'd 'be'd mo dhali ki bany bany kagahara mo. Ton kamu/ yisa di'da e mony'cesh yan jin midi mish dhagam uni ki kush kush kan mo.

<sup>4</sup> Dhali e mun mo tani Iliyya piki uni i is mo uni ka Musa mo, dhali uni tor ka Yesus mo be.

<sup>5</sup> Dhala Buterus ki owa Yesus gwo mo ki: Tapa, a'di 'boro'd gom am ki aman 'kona imahan mo. Dhalki aman nyanja cina/ ikwara mo, jan tal 'de/ gom /e mo dhali jan tal 'de/ goma Musa mo dhali jan tal 'de/ den kamu/ gom Iliyya mo be.

<sup>6</sup> Haali/ a'di diki mish gwo jin ona a'di mo haali/ uni ko/kina ko/ is kagahara mo be.

<sup>7</sup> Dhali arak 'kamki uni is mo dhali 'twa/ pu'dki'd 'peni bwam ma rak yansan mo mmo/o gwo mo ki: Yansan ta Ya/m pem jin enka/ mo. Ciki a'di gwo mo ma.

<sup>8</sup> Dhali ki jahanne/ ki uni hilki mo mo mmo'kar mo ki e mo tani uni yisa mishki wathin kamu/ mo jin nyak di ki uni mo, hili jasa Yesus a'di 'de/ mo be.

<sup>9</sup> Dhali ki uni 'kokin mo mmothul ka 'cesh mo 'peni 'kuwosh mo tani a'di ki kan uni gwo ki 'bi'th mo mmo'koki tor wathin kamu/ tal 'de/ gwo gom to jin parkina uni e mo ntagi Ya/ gi 'Kwani minu 'de'k mo 'peni mowu mo be.

<sup>10</sup> Wakan uni dhuki gwo mo mmokulum gwo ibwa mo uni 'cena mo mmodot eya dum buni gom 'pemen gwo jin okina a'di ki a'di midi cuyu mis mo 'peni mowu mo.

<sup>11</sup> Dhali uni ki dot a'di gwo mo ki: Katinta sa/ i/ ona iman'kwar to gwo mo ki Iliyya midi mii pu'du/ itwa/a/ mo?

<sup>12</sup> Dhali a'di ki thok uni gwo mo ki: Iliyya pu'dki'di twa/a/a mo dhali tela ris to 'baar mo sho'k ka nyan'ko'd mo. Dhali ba ki gwo 'kwaru kataye ki Ya/ gi 'Kwani mina isi 'taki 'kosh ka nyor ki nyanye/ mo gom miin tiya ka ris mo dhali minu mii ka jin

thus mo dhali minu wak mo be.

<sup>13</sup> Hili aha/ tora um gwo mo ki Iliyya pu'dki'd mo dhali uni miiki a'diyin jin 'bori uni bwa mo me'd gwo jin 'kwarkunu mo gom a'di mo be.

*Yesus Wacki'da 'Ci jin Bu'thkin ma Rum Thus jin Nyo/o'd mo*

<sup>14</sup> Dhali ki uni pu'dkin mo e imancik a'di gwo mo tani uni parkina dhana buhany wathimpa e mo kun 'kamki a'di mo dhali iman'kwar to garki uni gwo 'kusi 'twa/ mo.

<sup>15</sup> Dhali ki jahanne/ adhana buhany wathimpa ki uni parki a'di e mo tani uni 'kokini momer kagahara mo dhali uni sokin 'kup ki a'di mo dhali the a'di me'd mo be.

<sup>16</sup> Dhali a'di ki dot uni gwo mo ki: Gwonta su'kkina um nyakki uni mo?

<sup>17</sup> Dhali jan tal 'de/ 'pena buhany wathimpa thokki a'di gwo mo ki: Mantor Gwo, aha/ suskina ya/m pem i /e mo haali/ a'di bu'thkin ma rum thus jin nyo/o'd jin mol a'di 'twa/ wal mo.

<sup>18</sup> Dhali ki a'di bu'thki a'di mo tani a'di torki a'di 'ko'da 'cesh mo, dhali a'di shwaki'da gabusha/ mo dhali rem shem piti 'kup mo dhali a'di peshki'd mo. Dhali aha/ dotkina imancik /e gwo gwo mo mmo/ur a'di ka pije/ mo tani dhali uni molki a'di mii mo be.

<sup>19</sup> Dhali a'di ki thok uni gwo mo ki: Ayy, um 'kwani kun tana nyakum yil kun atha mongam gwo is ki ath mo. Ki aha/ mina di i um ki mo gi wakata mo? Dhali ki mo gi wakata imiga/ i'dim 'kup e um mo sa/? Susi a'di i aha/ mo ma.

<sup>20</sup> Dhali uni ki susa 'ci i a'di mo. Dhali ka rum thus jin nyo/o'd parki a'di e mo tani dhali ki

jahanne/ a'di ki tora 'ci 'ko'da 'cesh mo dhali a'di ki bita 'cesh mo dhali 'danjal ka gabusha/i'twa/ mo be.

<sup>21</sup> Dhala Yesus ki dot com gwo mo ki: Kakasja sa/ imiikina a'di mii gi wakan mo? Dhali a'di ki thok a'di gwo mo ki: 'Pena cim jin tana a'di a'ci mo be.

<sup>22</sup> Dhali me'd ka ris a'di ki bit a'di e bwam o'd mo dhali e bwam yi'de/ mo mmo'ce'd a'di sho'k mo tani hili wakki/ /e mini mish toj kamu/ mii mo mmomina /e hila ha'th'ko'd bam mo dhali woth am mo.

<sup>23</sup> Dhala Yesus ki o a'di gwo mo ki: Wakki/ /e ona bwa mo tani aris to mishu mii mo gom a'di jin gamki gwo is mo be.

<sup>24</sup> Dhali ki jahanne/ com ma 'ci gwoki'd ki jabu'th mo dhali o gwo mo ki: Aha/ gamkina gwo is mo. Wothi/ aha/ mo mmodika/ ki dar gi gwo jin gamu is mo.

<sup>25</sup> Dhali ka Yesus mishki'da dhana buhany wathimpa pu'dkin mo mmosoyu/ mo mmontal 'de/ mo tani a'di kucurki'da rum thus jin nyo/o'd ki gwo mo mmo/o a'di gwo mo ki: /E jin noni wathi/ 'twa/ wal mo dhali /e jin ta wathi/ 'ceya 'diye/ mo, dhali /e jin tana arum jin nyo/o'd mo tani aha/ kankina /e gwo mo ki: Piyi ka pije/ 'peni a'di mo dhali dhalku/ ki se i a'di ki sule/ sule/ mo dok/e.

<sup>26</sup> Dhali 'ko'di cuuwam piti jin cuukina a'di mo tani a'di ki tor a'di 'ko'da 'cesh ki tor jin shiyi'd mo dhali a'di ki pi ka pije/ mo. Dhala 'ci a'di wakina e gi wathi/ jin wuki'd mo. Wakan aris uni 'baar mo oki gwo mo ki: A'di wuki'd mo be.

<sup>27</sup> Hila Yesus bu'th a'di ki me'd mo dhali 'de'k a'di ki mis mo. Dhali a'di cuki mis mo be.

<sup>28</sup> Dhali ki a'di cicki bwanj gu'b mo tani imancik

a'di gwo dot̄ki a'di gwo mo ka k̄wal is mo mmo/o gwo mo ki: Atinta gara/ i'kona aman ki mish a'di ur ka piye/ mo?

<sup>29</sup> Dhali a'di ki thoḵ uni gwo mo ki: Ji gi wakansan minu 'koki mish ur ka piye/ ki miin̄ kamu/ mo ba/, hili ki mon'tho mo be.

*Dok/e aYesus Torki Mowum Piti Itwa/a/ mo*

<sup>30</sup> Dhali uni iikin 'peni mun mo dhali ii ki tur mo e Pany Jaliil mo. Dhali a'di diki dhal wathin ṭal 'den̄ kamu/ bway mo mmomish a'di mo be.

<sup>31</sup> Haali/ a'di ṭorki imancik̄ a'di gwo gwo mo mmo/o uni gwo mo ki: Ya/ gi 'Kwani minu ḱi e me'd gi 'kwanin thus mo, dhali uni mini 'kosh a'di jwa mo. Dhali ki a'di minu 'kosh jwa mo tani 'ko'da cim kwara mo tani a'di midi cuyi mis mo be.

<sup>32</sup> Hili uni 'koki mish gwo 'ban jin ona a'di mo dhali uni ḱo/ki is mo mmodot̄ a'di mo be.

*Kaja A'di Icade?*

<sup>33</sup> Dhali uni pu'dkin mo e Paṅ Kapranahuum mo. Dhali ki a'di diki'd e bwan̄ gu'b mo tani a'di ki dot̄ uni gwo mo ki: Gwonta sa/ isu'kkina um mmo/ iiyina um ibway mo?

<sup>34</sup> Hili uni 'kokin ki shwam mo haali/ e bway jin iiyina uni mo tani uni su'kkin ki gwo ka rem 'kup mo gom gwo gi a'di jin caki'd mo be.

<sup>35</sup> Dhali a'di ḱa'bki'da 'cesh mo dhali yuk̄ unin̄ 'kume'd i'ce'dka su/ mo, dhali a'di ki o uni gwo mo ki: Wak̄ki/ wathin ṭal 'de/ jin ona bwa ki ta jin ṭwa/a/ mo tani a'di midi mii ta jin̄ 'ko'd mo dhali ta amanmii to gom tiya 'baar mo be.

36 Dhali a'di ki budha 'ci mo dhali kar a'di ibwaman uni mo. Dhali mmokara a'di a'di 'ko'da bim piti mo tani a'di ki o uni gwo mo ki:

37 A'diyin jin midi budha 'ci gi wakansan ki gway pem mo tani a'di bu'thki aha/ mo, dhali a'diyin jin midi bu'th aha/ mo tani a'di diki bu'th aha/ jasi 'te/ mo, hili a'di bu'thki a'di jin tu'cki aha/ ki yayu/ mo be.

*A'di Caan jin Diki Di apo/ Ana mo tani A'di Ta A'di gom Ana mo*

38 Yohaán ki o a'di gwo mo ki: Aman̄tor Gwo, aman mishkina wathin̄ kamu/ jin urki'da rum thus ka piye/ ki gway pini mo dhali a'di diki bath̄ ana nsho'k mo, dhali aman nonkina a'di mo haali/ a'di diki ta amanbath̄ ana nsho'k mo be.

39 Hila Yesus ki o gwo mo ki: Dhalki a'di ki non mo ma haali/ a'di jin midi miya tu'c jin eka/ ek̄ ki gway pem mo tani a'di midi diki mish mmo/o gwon thus apo/ aha/ mo ki jahanne/ ŋ'ko'd mo.

40 Haali/ a'di jin diki se ana shoka po/ mo tani a'di ta a'di gom ana mo be.

41 Haali/ ka jin̄ gana/ aha/ tora um gwo mo ki: A'diyin jin midi ci um yi'de/ ki 'kwa mmopi mo haali/ um yuku ki gway ma Kristhos mo tani a'di yisa midi this tom piti jin ish kumma/ e mo.

*Mompal gom Miinthus mo*

42 A'diyin jin midi rak̄ jan tal 'de/ 'peni uni gwansan kun gwa'dan kun gam gwo is e aha/ mo mmomii miinthus mo tani a'di midi 'taki 'bor ki 'bor gana/ mo wakka dhana yo minu dek̄ a'di i'bam piti mo dhali a'di minu bit̄ mo e kumma/ yi'de/ mo.

<sup>43</sup> Dhali waḱki/ me'd pini raḱ /e mo mmomii miinthus mo mmokol mo tani 'ciṯhi/ a'di mo ma. A'di 'boro'd ki 'bor gana/ mo gom /e mo mmociḱ mondiki/e ki ṅul mo ki /e mini 'taki diki ya e mo ma al o'd ki me'd su/ mo be, e mo jin mola o'd us mo.

<sup>44</sup> E mun mo tani ayish buni 'koki wu mo dhali o'd si'da/ diki us mo be.

<sup>45</sup> Dhali waḱki/ sho'k pini raḱ /e mo mmomii miinthus mo mmokol mo tani 'ciṯhi/ a'di mo ma. A'di 'boro'd ki 'bor gana/ mo gom /e mo mmociḱ mondiki/e ki ṅwol mo ki /e minu i'taki 'koki biṯ ki sho'k su/ e mo ma al o'd mo be.

<sup>46</sup> E mun mo tani ayish buni 'koki wu mo dhali o'd si'da/ diki us mo be.

<sup>47</sup> Dhali waḱki/ em pini raḱ /e mo mmomii miinthus mo mmokol mo tani buḱi a'di ka piḱe/ mo. A'di 'boro'd ki 'bor gana/ mo gom /e mo mmociḱ Bampa/ ma Arungimis ki en ṯal 'de/ mo ki /e minu i'taki 'koki biṯ ki e su/ mo e mo ma al o'd mo.

<sup>48</sup> E mun mo tani ayish buni 'koki wu mo dhali o'd si'da/ diki us mo be.

<sup>49</sup> Haali/ aris 'kwani 'baar mo ka 'deṯe/ 'deṯe/ mo tani uni minu imii ka 'doṅkoro/ ki mo/o'd mo be.

<sup>50</sup> A'doṅkoro/ a'di 'bora'bor mo. Hili waḱka 'doṅkoro/ a'di ki this mom'bala'th piti e mo tani um mini gam mon'daṅkari'th gom a'di mmana? Tayi ka 'doṅkoro/ e is bum mo ma dhali tayi ki moṅḱu'th is ka rem 'kup mo ma.

## 10

*Yesus Ṭorki Gwo gom Mo jin Dhaluwa Dhal 'Pen mo*

1 Dhali a'di dhalki mo yan 'pen mo dhali yaki'd mo e Bampa/ gi Pa Yahuudiyya mo dhali e bwampo/ Yi'deŋ Kumma/ Uurdun mo, dhala dhana buhany wathimpa thulki is i a'di mo dok/ e. Dhali dok/ e me'd miim piti jin miina a'di isa yempa/ mo tani a'di ki tor uni gwo mo be.

2 Dhali 'Kwani Parisiyiin pu'dkin mo mmonap bway mo mmopal a'di ki gwondoŋ mo mmo/o gwo mo ki: A'di ta gwoŋkan jin dhala'da dhal bway mo 'taa? gom wathi/ mmothoson gwo jin dhaluwa dhal 'pen mo mmodhal ash 'pen mo?

3 A'di ki thoŋ uni gwo mo ki: Gwo gi wakatinta iŋankin ma Musa um mo?

4 Uni thoŋki a'di gwo mo ki: AMusa a'di dhalki wathi/ bway mo mmo'kwara warka/ jin dhaluwa dhal 'pen mo dhali kara yim 'pen ka piŋe/ mo be.

5 Hila Yesus ki o uni gwo mo ki: Haali/ goma dum bum kun 'bitha'bi'th kan mo tani a'di 'kwarki um gwoŋkan gi wakansan mo be.

6 Hili 'peni ka muŋ'kup jin uku to mo tani Arumgimis ki uk wathiŋ gwaŋh mo dhali wathim 'bomi mo be.

7 Gom 'kup gwo gi wakan mo tani a'di imina wathi/ idhal com 'pen mo dhali kum mo dhali gam is ki ashim piti mo be.

8 Dhali uni su/ mina bungwar isi tal 'de/ mo be. Wakan uni dok/ e yisa i'koni su/ dok/ e yisa, hili uni tala bungwar isa 'de/ mo be.

9 Gom mii gi wakan mo tani uni gun gam ma Arumgimis isi montal 'de/ mo tani dhalku/ ki dhal wathiŋ kamu/ bway mo mmoŋwa/ uni bwa mo.

10 Dhali e bwaŋ gu'b mo tani imanciŋ a'di gwo doŋki a'di gwo mo gom gwo yansan dok/ e mo.



11 Dhali a'di ki o uni gwo mo ki: A'diyin jin midi dhal ashim piti 'pen mo dhali mash jaŋ kamu/ mo tani a'di miiki miinyal apowa yim mo be.

12 Dhali wakka yim si'da/ dhala'da kaŋhim piti 'pen mo dhali mashi jaŋ kamu/ mo tani ayim si'da/ miiki miinyal mo be.

### *Yesus 'Borki Ushi Uciŋ Gwa'dga/ Mii mo*

13 Dhali uni 'kokin mo mmosusi uci i a'di mo ki a'di midi 'taki ta uni is ki me'd mo. Dhali imanciŋ a'di gwo kucurki uni ki gwo mo be.

14 Hili ka Yesus mishki mii yan mo tani a'di dekki ma nyor mo dhali o uni gwo mo ki: Dhalki uci iiyini aha/ mo ma. Dhalki uni ki non mo. Haali/ ku gi wakansan mo tani uni 'kokin mo e Bampa/ ma Arungimis mo be.

15 Ka jinŋ gana/ aha/ tora um gwo mo ki a'diyin jin midi diki bu'th Bampa/ ma Arungimis mo mmowa e ka 'ci yan mo tani a'di midi diki se a'di mo be.

16 Dhali a'di ki sus uni mo mmodhu 'ko'da bim piti mo dhali a'di ki 'bor uni mii mo mmokarkina a'di me'd piti apo/ uni mo be.

### *Wathin Dhuru'c jin Ta Pa ki Pa mo*

17 Dhali mmomurkina a'di mmoya mo e bway piti mo tani wathin tal 'deŋ kamu/ guski'd mo dhali ca'bki jinŋ 'kupa'dupun i bwambori a'di mo dhali o a'di gwo mo ki: Aman'tor Gwo jin 'boro'd mo, ki aha/ mina mii miiya taye mmogam mal gi mondiki/e ki sule/ ya ye 'ba/ mo?

18 Dhala Yesus ki thoŋ a'di gwo mo ki: Atinta yuka /e aha/ ki jin 'boro'd mo? Jan tal 'deŋ kamu/

yisa di'da jin 'boro'd mo, hili jasa Arumgimis a'di 'de/ mo be.

<sup>19</sup> /E mishki gwonkan kun 'kwarkunu mo 'taa? kun o gwo mo ki: Dhalka 'kosh ki mii 'kosh mo, dhali, Dhalki cal ki mii mii mo, dhali, Dhalku/ to ki mii kwal mo. dhali, Dhalki gwon thus ki mii ak wathin kamu/ i is mo, dhali, Dhalki to ki mii dil mo, dhali, Taki cim dhali kwan mo?

<sup>20</sup> A'di ki thok a'di gwo mo ki: Amanfor Gwowa, aris to gwansani 'baar mo miikika/ mo ki aha/ tana dhuru'c mo be.

<sup>21</sup> Dhala Yesus ki hil a'di ki e mo dhali en a'di mo dhali o a'di gwo mo ki: Ton tal 'de/ at̄ha /e mo be. Yaku/ mo dhali yol aris tom pini 'baar mo kun tana /e mo dhali ciki uni ki 'kwani kun hatha'ko'd mo, dhali /e mini ta gi to kun mini ish kumma/ mo e momis mo, dhali yayu/ mo ma, mmobath̄ aha/ nsho'k mo.

<sup>22</sup> Gom gwo jin onu a'di kan mo tani a'di ki bit a'di bwa ka lunḡu'b mo dhali a'di ki ya bway pa mo ki bwa jin diṭadiṭ mo, haali/ a'di ta'd gi dhan to kun eka 'pen ki ek mo be.

<sup>23</sup> Dhala Yesus ki hil mo mo dhali 'kar mo ki e mo dhali o imancik a'di gwo gwo mo ki: Mii wa'di diṭa/ gom uni gwansan kun ta pa ki pa mo mmociṭ Bampa/ ma Arumgimis mo be.

<sup>24</sup> Dhali imancik a'di gwo merkin gom gwom piti yansan mo be. Hila Yesus ki o uni gwo mo dok/e ki: Uciya, a'di wana mii diṭa/ gom uni gun gamki gwo is gom pam buni kun tana uni mo mmociṭ Bampa/ ma Arumgimis mo.

<sup>25</sup> A'di 'disha mii ki 'dish gom kalman mo mmoya ki solol e jis ma 'dipira/ mo mmodhal

wathimpa e i is mo, a'di jin ta pa ki pa mo mmocic Bampa/ ma Arungimis mo be.

<sup>26</sup> Dhali uni 'kokin mo mmomer mo ka daran dun gana/ mo dhali o gwo ka rem 'kup mo ki: Ba wakki/ wakan mo tani ija a'di iminu iwot̄h moyi?

<sup>27</sup> Yesus ki hil uni mo dhali o uni gwo mo ki: Ki 'kwani mo tani a'di molu mii mo, hili ka Arungimis mo tani aris to 'baar mo mishu mii ka Arungimis mo be.

<sup>28</sup> Hila Buterus telki mii 'pen mo mmo/o a'di gwo mo ki: Hili, aman dhalkina aris to 'peni 'baar mo dhali bath̄ /e nsho'k mo be.

<sup>29</sup> Yesus ki o uni gwo mo ki: Ka jin gana/ aha/ ona um gwo mo ki: wathin̄ kamu/ yisa di'da jin dhalki gu'b piti 'pen mo walla ikam piti mo walla i'bwah piti mo walla kum mo walla com mo walla uci mo walla mo mo gom gway pem mo dhali gom gway gi gwom 'borga/ mo tani

<sup>30</sup> a'di jin midi diki bu'th to ki me'd iss 'kwan-impā ka mudhe'd mo shwane/ mo ki mo yansan mo, gu'b mina a'di gam mo dhali ikam piti mo dhali i'bwaham piti mo dhali ikum mo dhali uci mo dhali mo mo nyakki to kun mini to'c a'di 'kus mo, dhali ki she yil yan jin midi pu'du/ mo tani a'di midi gam mondiki/e ki sule/ sule/ ya ye 'ba/ mo be.

<sup>31</sup> Hili aris uni gun 'koni t̄wa/a/ mo tani uni minu dhu n̄'ko'd mo dhali uni gun 'koni 'ko'd mo tani uni minu dhu it̄wa/a/ mo be.

*AYesus Torki Wum Piti Me'di Kwara It̄wa/a/ mo*

<sup>32</sup> Dhali uni 'kokin mo mmo/ii i bway mo mmo/ii ka gagamis mo e Pa Urushaliim mo dhala Yesus yaki'di shu uni bway mo. Dhali uni 'kokin mo mmomer mo dhali uni gwansan kun bath̄ki a'di

nsho'k mo tani ko/ki is mo. Dhali a'di ki sus uni gun 'koni 'kume'd i'ce'dka su/ mo dok/e dhali a'di ki tel mii 'pen mo dhali tor uni gwo mo gom to gun minu mii a'di mo be,

<sup>33</sup> mmo/o gwo mo ki: Hili mo mo ma, ana iina ka gagamis mo e Pa Urushaliim mo, dhali Ya/ gi 'Kwani minu ci mo e igasiis kun can mo dhali iman'kwar to mo, dhali uni mini wak a'di mo mmo'kosh a'di jwa mo, dhali a'di minu ciki 'kwani kun 'koki ta 'Kwani Yahuuda/ ime'd mo be.

<sup>34</sup> Dhali uni mini mii a'di ka mak mo dhali 'tak a'di manya/ i is mo dhali dor a'di mo dhali 'kosh a'di jwa mo. Dhali 'ko'da cim kwara mo tani a'di midi piyu/ ka pije/ mo be.

### *Gwondot ma Yakuub mo dhala Yohaana mo*

<sup>35</sup> Dhala Yakuub dhala Yohaana uni gun ta iya/ ma Sabadi mo tani pu'dkin kadhoj 'kup ki a'di mo dhali o a'di gwo mo ki: Aman'or Gwo, aman ona bwa ki /e mini dhal aman bway mo gom to jin mina amani dot 'peni /e mo be.

<sup>36</sup> Dhala Yesus ki o uni gwo mo ki: Atinta o um bwa mo jin miga/ mii gom um mo?

<sup>37</sup> Dhali uni ki tho'k a'di gwo mo ki: Dhas am bway mo ma mmo'ko mo. Jan 'de/ midi ca'b /e ki me'da bim poros pini mo dhali jan 'de/ midi ca'b /e ki me'da biny cam pini mo e monycam pini mo be.

<sup>38</sup> Hila Yesus ki o uni gwo mo ki: Um 'koki mish to jin do'a um mo. A/um mini piya kubbaaya jin pikika/ mo walla a/um minu cu'c mo ki mii jin miinuwa mii ki yi'de/ mo jin miikunu aha/ mo?

<sup>39</sup> Dhali uni ki tho'k a'di gwo mo ki: Aman mina mish mii mo be. Dhala Yesus ki o uni gwo mo ki:

Akubbaaya jin pika/ mo tani mina umi pi mo dhali mo jin miinu aha/ amii ki yi'de/ mo tani a'di imiinu mii um si'da/ mo be.

<sup>40</sup> Hili mmo'ko aha/ ki me'da bim poros pem mo walla ki me'da biny cam pem mo tani a'di diki ta miim pem mo mmodhas um bway mo, hili a'di gom uni gwansan kun thosonkunu uni mo be.

<sup>41</sup> Dhali ki uni gun 'koni 'kume'd cikki gwo yansan mo tani uni telki mii 'pen mo mmodeka nyor mo goma Yakuub mo dhala Yohaana mo be.

<sup>42</sup> Dhala Yesus ki yuk uni mo i a'di mo dhali o uni gwo mo ki: Um mishki gwo mo gom uni gwansan kun o ki ta tapa apo/ 'kwani kun 'koki ta 'Kwani Yahuuda/ mo tani uni mii miin tapa apo/ uni mo dhali 'kwanim buni gun eka/ ek kun ta gi moshirr mo apo/ uni mo be.

<sup>43</sup> Hili mii yansan minu 'koki mii wakan apo/ um mo. Hili a'diyin jin midi eka/ ek mo e bwam um mo tani a'di midi mii ta a'di jin midi mii um to mo be.

<sup>44</sup> Haali/ a'diyin jin midi mii ta jin twa/a/ mbwaman um mo tani a'di midi mii ta cinkina/ gom umi 'baar mo be.

<sup>45</sup> Haali/ Ya/ gi 'Kwani si'da/ pu'dki'd mo yisa ki a'di minu mii to mo, hili ki a'di midi mii 'kwani to mo dhali ci mondiki/em piti mo mmota Amanwan 'Kwani 'Ba/ ka ris mo be.

*Bartimawuus jin Ta Wathiny Ja'da/ Bu'thki Momish Mo mo*

<sup>46</sup> Dhali uni pu'dkin mo e Pa Ariiha mo. Dhali ki a'di di'd mmodhal Pa Ariiha 'pen mo nyakki imancik a'di gwo mo tani adhana waambuhany wathimpa caaca kagahara mo.

Dhali wathiny ja'daŋ kamu/ diki'd jin yuḵkunu gway ka Bartimawuus mo jin ta'da man'tho to mo, a'di jin ta ya/ ma Timawuus mo, a'di ɕa'bki'd mo e shemen bway isa yempa/ mo.

<sup>47</sup> Dhali ki a'di cikki gwo goma Yesus ki Pa Naasira mo tani a'di telki mii 'pen mo mmocuu gwo ki dhan 'twa/ jin caaca mo dhali o gwo mo ki: Yesus, jin ta Ya/ ma Dawuu'd. Miiyi mii apo/ aha/ mo ma.

<sup>48</sup> Dhali 'kwani ka ris ḵucurki a'di ki gwo mo mmotor a'di gwo mo mmoɕa'b ki shwam mo. Hili a'di cuuki'd kagahara ki nyanye/ ki nyanye/ mo ki: Ya/ ma Dawuu'd. Miiyi mii apo/ aha/ mo ma.

<sup>49</sup> Dhala Yesus doshki'd mo dhali o gwo mo ki: Yuḵi a'di mo ma. Dhali uni ki yuḵi wathiny ja'da/ mo dhali o a'di gwo mo ki: Budhi adu mo ma. Cuyi mis mo. A'di yuḵki /e mo be.

<sup>50</sup> Dhali a'di bitki burrinye/ ma pom piti a'cesh mo dhali a'di ki pe imis mo dhali ya aYesus mo.

<sup>51</sup> Dhala Yesus ki o a'di gwo mo ki: Ata o /e bwa jin miga/ mii gom /e mo. Dhali wathiny ja'da/ ki o a'di gwo mo ki: Tapa, dhalki aha/ butha momish mom pem mo ma.

<sup>52</sup> Dhala Yesus ki o a'di gwo mo ki: Yaku/ i bway pini mo. Moŋgam gwo is pini a'di wothki /e mo. Dhali ki jahanne/ a'di ki bu'th momish mo mo dhali baḥh a'di nsho'k ibway mo be.

## 11

*Mo jin Pinu Mii E mo Mmocic Pa Urushaliim mo*

<sup>1</sup> Dhali ki uni 'dishki Pa Urushaliim is mo e Pam Beetpaji mo dhali e Pam Beetaniya mo e 'Kuwosh

Setuun mo tani a'di ki hash imanciƙ a'di gwo isu/ mo be

<sup>2</sup> Dhali o uni gwo mo ki: Iiku/ i bampa/ jin di'd ka par 'twa/ i um mo, dhali ki jahanne/ ki um mini ciƙ a'di mo tani um mini gam ari thulunƙ jin shi'du/ mo. A'di yisa merkina wathinƙ kamu/ apowa. 'Cuki a'di mo dhali guyu/ a'di mo.

<sup>3</sup> Wakƙi/ wathin 'deƙ kamu/ mido o um gwo mo ki: Atinta mina um kan mo tani tori a'di gwo mo ki: Tapa a'di mido mii ta gi a'di mo dhali mido hashu/ a'di ka nyanƙ'ko'd ki jahanne/ mo imahan mo.

<sup>4</sup> Dhali uni iikin mo dhali gam ari thulunƙ jin shi'dkunu mo e 'twanƙal bway tura beega/ mo. Dhali uni 'cuki a'di mo be.

<sup>5</sup> Dhali uni gwansan kun doshkin mo tani o uni gwo mo ki: Atinta imina um kan mo sa/? Um 'cuki ari thulunƙ gomata?

<sup>6</sup> Dhali uni ki tor uni gwo mo gom gwo jin okin ma Yesu mo, dhali uni ki dhal uni bway mo mmo/ ii mo be.

<sup>7</sup> Dhali uni ki susi ari thulunƙ Yesu mo dhali uni ki pa'd burriƙem buni apo/ a'di mo dhali a'di ki mer a'di apo/ mo be.

<sup>8</sup> Dhali 'kwani ka ris uni pa'dki burriƙem buni e bway tur mo be. Dhali kun tiya pa'dkina biny cwa kun ƙwa/kina uni 'peni bwam bunto mo be.

<sup>9</sup> Dhali uni gwansan kun iikini tƙa/ a/ mo dhali uni gwansan kun baƙƙi uni nsho'k mo tani uni ƙumki cuuwa/ mo ki 'twa/ kun caaca mo ki: Hosanna. Mom'bor mii mido di mo gom a'di jin pu'dki'd ki gway gi Tapa mo be.

<sup>10</sup> Mom'bor mii mido di mo gom Bampa/ ma ababam bana ka Dawuu'd a'di jin pu'dki'd mo.

Hosanna jin di'di mis mo.

<sup>11</sup> Dhali a'di cički'd mo e Pa Urushaliim mo dhali a'di seki gu'b gi mondheleladhelel mo be. Dhali ki a'di hilki mo mo dhali 'kara ris to 'baar mo ki e mo tani dhali ŋ'ko'd a'di ki dok Pam Beetaniya nyakki uni gun 'koni 'kume'd i'ce'dka su/ mo haala tente/ yulu'd mo be.

### *Cwampu/jin Jeekunu mo*

<sup>12</sup> Dhali ka cim jin batha'di 'ko'd mo tani ki uni pu'dkin mo e Pam Beetaniya mo tani a'di 'koshkina te/ mo be.

<sup>13</sup> Dhali a'di mishki'da pu/ 'pena dhana/ mo jin lu/u'd mo. A'di ki ya mo mmopar e mo wakki/ a'di midi 'taki gam maman 'peni a'di mo. Ki a'di pu'dki'di a'di mo tani a'di diki gam toŋ kamu/ mo hili jasi 'cemen gana/ mo haali/ a'di diki ta yil ma pu/ mmodho'th mo be.

<sup>14</sup> Dhali a'di ki o a'di gwo mo ki: Wathin tal 'denj kamu/ midi diki shwa maman 'peni /e dok/e mo ki sule/. Dhali imancik a'di gwo cikki gwo yansan mo be.

### *Mmodhelel Gu'b gi Mondheleladhelel mo*

<sup>15</sup> Dhali uni pu'dkin mo e Pa Urushaliim mo. Dhali ki a'di cički gu'b gi mondheleladhelel mo tani dhali a'di telki mii 'pen mo mmo/ur uni gwansan ka pije/ kun yoli to mo, dhali uni gwansan kun yolki to mo e gu'b gi mondheleladhelel mo. Dhali a'di ki kuma tharabeesa 'twa/ a'cesh mo gun ta ku gi uni gwansan kun wanki emena guurush mo dhali a'di ki kum to 'twa/ a'cesh mo kun 'kona imanyol gurko/ mo be.



16 Dhali a'di diki dhal uni bway mo mmo'do ton tiya mmo'cih ki tur mo e gu'b gi mondhelelad-helel mo be.

17 Dhali a'di torki gwo mo dhali o uni gwo mo ki: A'di diki ta gwo jin 'kwarkunu mo 'taa? ki: Gu'b pem minu yuk ki gu'b jin minu 'tho goma ris kal gi 'kwaniny'ceshi 'baar mo? Hili um ki mii a'di me'd gu'b gi 'kwani kun ta imandil to mo be.

18 Dhali igasiis kun can dhali iman'kwar to mo uni cikki gwo yan mo dhali uni nɔpki bway mo mmo'ce'd a'di sho'k mo haali/ uni ko/ki a'di mo haali/ awaambuhany 'kwani caaca kagahara mo merkin mo gom gwom piti jin torkina a'di mo be.

19 Dhali ki mom'pimpili/ pu'dki'd mo tani a'di dhali imancik a'di gwo uni iikin ka pije/ mo 'peni 'penkuman bampa/ mo.

### *Gwo gom Cwampu/jin Ku'thki Gun'kuru/ mo*

20 Me'd jin iikina uni ki iimpe mo mon'thamo/ mo tani uni parkina pu/ e mo mmoku'thkina a'di hila/ ka birman ilu/ mo be.

21 Dhala Buterus kakina gwo e mo dhali o a'di gwo mo ki: Tapa. Hila pu/ mo ma, a'di jin jeekina /e mo tani a'di ku'thki'd mo be.

22 Dhala Yesu ki thok uni gwo mo ki: Tayi gi mongam gwo is mo eya Arungimis mo.

23 Ka jin gana/ aha/ ona um gwo mo ki: A'diyin jin midi o wosh yansan gwo mo ki: Dhalki a'di gunu mo dhali bit mo e bwan kumma/ yi'de/ mo dhali diki ta ga du jin shi/i gwo 'kup mo tani, hili a'di gamki gwo is gom a'di jin okina a'di mo tani ki a'di midi pu'd mo tani a'di minu mii gom a'di mo be.

<sup>24</sup> Wakan aha/ t̄ora um gwo mo ki a'diyin jin mina umi dot̄ ki mon'tho mo tani gami gwo is mo ma, ki a'di mina umi bu'th mo dhali um mini bu'th a'di mo be.

<sup>25</sup> Dhali ma mo yin jin mina umi dosh mo mmo'tho mo tani dhalki a'di 'pen mo wak̄ki/ um ta gi gwo jin ona um is apo/ cin tiya mo tani wakan si'da/ Ababam bum jin di'd e momis mo midi dhal um gwon dhan̄ bum 'pen mo be.

<sup>26</sup> Hili wak̄ki/ um 'koki dhal 'kwani amure/ mi-inthus buni 'pen mo tani wakan si'da/ Ababam bum jin di'd e momis mo midi diki dhal um amure/ mi-inthus gi gwon dhan̄ bum 'pen mo be.

*Moshirr ma Yesus jin Dot̄kunu Gwondot̄ mo*

<sup>27</sup> Dhali uni pu'dkin dok̄/e mo e Pa Urushaliim mo. Dhali ki a'di diki'd mmoya e gu'b gi mondhele-ladhelel mo tani igasiis kun can dhali iman'kwar to mo dhali 'kwaniṅ gwanyjaka/ mo uni pu'dkini a'di mo be.

<sup>28</sup> Dhali uni ki o a'di gwo mo ki: Ki moshirr jana sa/ imiikina /e aris to gwansani 'baar mo, walla kaja ic̄iki /e moshirr yansan mo mmomii uni mo?

<sup>29</sup> Yesus ki thoḵ uni gwo mo ki: Aha/ si'da/ mina dot̄ um gwondot̄ mo. Thoḵi aha/ gwo mo ma dhali aha/ mina t̄or um a'di jin c̄iki aha/ moshirr mmomii aris to gwansan mo be.

<sup>30</sup> Mo jin miin ma Yohaana mii ki yi'de/ mo tani, a'di 'peni momis mo 'taa? walla 'peni 'kwani mo? Thoḵ aha/ gwo mo ma.

<sup>31</sup> Dhali uni garki gwo 'kusi 'twa/ ka rem 'kup mo mmo/o gwo mo ki: Wak̄ki/ aman mina o gwo mo ki: 'Peni momis mo tani, a'di midi o am gwo mo ki: Batinta 'kona um ki gam a'di gwo is mo?

<sup>32</sup> Hili wakki/ aman mina o ki: 'Peni 'kwani mo tani uni ko/ki 'kwani mo haali/ aris 'kwani 'baar mo karkina Yohaana ka manci gwo ma Arumgimis gana/ mo be.

<sup>33</sup> Wakan uni thokkina Yesus gwo mo ki: Aman 'konaki mish mo mo. Dhala Yesus ki o uni gwo mo ki: Wakan si'da/ aha/ mina diki tor um gwo mo gom a'di jin ciki aha/ moshirr mo mmomii to gwansan mo be.

## 12

*Gwom 'Bi'th/e gom Bwam Monsinu ma Mura'th dhali Uni gun Hil Mo mo*

<sup>1</sup> Dhali a'di telki mii 'pen mo mmo tor uni gwo mo ki gwom 'bi'th/e mo mmo/o gwo mo ki: Wathi/ diki'd mo jin siki'da mura'th mo dhali a'di ki nyaŋa goŋ mo mmo'kam a'di is mo dhali a'di ki cwany jis gom yimana mura'th mo dhali a'di ki nyaŋ 'kukuma/ isi mis mo, dhali a'di ki dhal a'di e imanmii to ka guurush mo dhali a'di ki ya bampaŋ kamu/ jin si'dasi'd mo be.

<sup>2</sup> Dhali ki mo pu'dki'd mo tani a'di ki hash cinjinaŋ kamu/ e imanmii to ka guurush mo mmo'taki kali maman cwan tiya 'peni monsinu mo be.

<sup>3</sup> Dhali uni bu'thki a'di mo dhali dor a'di mo dhali uni ki hash a'di me'd te/ mo be.

<sup>4</sup> Dok/e a'di ki hash ki uni cinjinaŋ kamu/ i uni mo dhali uni waki a'di 'kup ki jama/ mo dhali uni ki mii a'di ka jin thus ki mon'the is mo be.

<sup>5</sup> Dhali a'di ki hashki uni jaŋ kamu/ mo dhali a'di si'da/ 'koshkina uni jwa mo. Dhali wakan si'da/ kun tiya ka ris 'koshkina uni mo dhali kun tiya

dorkina uni mo dhali kun tiya 'koshkina uni jwa mo be.

<sup>6</sup> A'di ta'd gi jasi jin tal 'deŋ gana/ mo jin di'di a'di mo, a'di jin ta ya/m piti jin ena a'di ki en gana/ mo. N'ko'd a'di ki uḥki uni ya/m piti mo mmohashki a'di e uni mo mmo/o gwo mo ki: Uni mini taḵ ya/ m pem mo be.

<sup>7</sup> Hili uni gwansan kun miiki to ka guurush mo o gwo mo ka rem 'kup mo ki: Amankal mala caan pu'dki'd mo. Dhalki ana 'kosha a'di jwa mo dhali mal midi ta jim bana mo be.

<sup>8</sup> Dhali uni bu'thki a'di mo dhali 'kosh a'di mo dhali kar a'di 'pen ka piye/ mo 'peni bwam monsinu mo be.

<sup>9</sup> Ata mina com gi mo ma mura'th i mii mo sa/? A'di midi pu'du/ mo dhali 'ce'd uni gwansan sho'k mo kun miiki to ka guurush mo dhali ci mo ma mura'th ki 'kwanin tiya mo be.

<sup>10</sup> 'Kona um ki deŋ Gwo e mo 'taa? Gwo jin 'kwarkunu mo.

Ka dhan wosha caaga/ yansan jin waḵkina iman-  
nyan gu'b mo tani

warki'd ki dhan wosh gi 'kupan ma rukun gu'b  
mo.

<sup>11</sup> Yansan ta mii gi Tapa mo be.

Dhali a'di ta dhan mii jin meru em bana mo be.

<sup>12</sup> Dhali uni palki mii mo mmo'taki cesh a'di mo tani hili uni ko/ kina waambuhany 'kwani mo haali/ uni nyiḥkin ki a'di torki gwom 'bi'th/e yansan apo/ uni mo. Wakan uni dhalki a'di mo dhali ii mo be.

*Mmoçika Kaysara Thulpa/ mo*

<sup>13</sup> Dhali uni hashki a'di 'kwanin tiya 'peni 'Kwani Parisiyiin mo dhali 'kwanin tiya 'peni 'Kwani ma Hirodusiyiin mo mmo'taki cesh a'di ki gwo jin ona a'di mo.

<sup>14</sup> Dhali uni pu'dkin mo dhali o a'di gwo mo ki: Amanɔr Gwowa, aman misha ki /e ta a'din gana/ mo dhali /e diki mii mii ka gwar 'de/ mo gom wathin kamu/ mo, haali/ /e diki tak 'kwani gom monycam buni mo hili ka jin gana/ /e tori gwo gi bway ma Arumgimis mo be. A/a'di ta gwonkan jin minu cika Kaysara thulpa/ mowa? walla minu dhalku/ mo?

<sup>15</sup> Mina aman 'taki ciya thulpa/ mo 'taa? walla mina aman 'taki dhal 'pen mo? Hili mmonyitha a'di ahe'k em buni mo tani a'di ki o uni gwo mo ki: Atinta palkina um aha/ kan mo? Guyi aha/ nasa guurush mo ma dhali dhalki aha/ para a'di e mo.

<sup>16</sup> Dhali uni ki guyi a'di jan 'de/ mo. Dhali a'di ki o uni gwo mo ki: Ki jamas maja a'dan sa/? Dhali a'di 'kwar maja imahan mo? Dhali uni ki thok a'di gwo mo ki: A'di ta jim ma Kaysar mo be.

<sup>17</sup> Yesus ki o uni gwo mo ki: Cika Kaysar to jin ta jim ma Kaysar mo ma dhali cika Arumgimis to jin ta jim ma Arumgimis mo ma. Dhali uni merkin mo gom a'di mo be.

### *Gwondot jin Dotu mo gom Mo jin Pinu mo*

<sup>18</sup> Dhali 'Kwani Sadukiyiin pu'dkini a'di mo, uni gun o gwo mo ki mompinun kamu/ yisa di'da. Dhali uni ki dot a'di gwondot mo mmo/o gwo mo ki:

<sup>19</sup> Amanɔr Gwo, aMusa a'di 'kwarki aman gwo mo mmo/o gwo mo ki: Wakka kam gi wathi/ midi

wu mo dhali dhal ashim piti mo hili diki dhal a'di a'ci mme'd mo tani wathi/ midi mii mash asha kam piti mo dhali cis uci goma kam piti mo be.

<sup>20</sup> Ikam uni 'kokini pesu/ mo be. Jin twa/ a/ bu'thki'da 'bom mo dhali ki a'di wuki'd mo tani a'di diki dhal a'di a'ci mo be.

<sup>21</sup> Dhali jin 'kon mo po/i su/ mo bu'thki'da yim mo dhali wuki'd mo si'da/ mmodiki dhal a'di a'ci mo dhali jin 'kon ma po/i kwara mo nyakkina mii gi wakansan mo be.

<sup>22</sup> Dhali unim pesu/ 'koki dhal a'di a'ci mo. Yan'ko'd mo tani a'bom si'da/ wuki'd mo.

<sup>23</sup> E mompinu mo tani a'bom midi ta asha ja mo? Haali/ gwaṭh 'kokini pesu/ kun bu'thki a'di mo mmota a'bom buni mo be.

<sup>24</sup> Yesus ki o uni gwo mo ki: A'di diki ta 'kup gwo jin ṭhu'thkina um mii mo ki um 'koki mish Gwo ma Arumgimis kun 'kwarkunu mo walla mom'bi'th ma Arumgimis mo?

<sup>25</sup> Haali/ ki uni mini piyu/ mo 'peni mowu mo tani uni mini mash dok/e yisa walla minu 'koki ci bway mo mmomash mo si'da/. Hili uni mina e waki iman'doyu gwo mo e momis mo be.

<sup>26</sup> Dhali gom gwo gi uni gun minu cuyi mis mo 'peni mowu mo tani 'kona um ki deṅ gwo e mo e gwo jin 'kwarkin ma Musa mo 'taa? e gwo gi ari cwa me'd jin on ma Arumgimis a'di gwo mo ki: Aha/ tana Arumgimis ma Ibrahiim mo dhali aha/ tana Arumgimis ma Is/hak mo dhali aha/ tana Arumgimis ma Yakuub mo?

<sup>27</sup> A'di diki ta Arumgimis gom uni gun wukin mo hili gom uni gun 'kon ki e mo. Um wani imanṭhu'th mii mana?

*Adhan Gwoŋkan jin Ca'd jin 'Kwarkunu mo*

28 Dhali jan tal 'deŋ kamu/ 'peni iman'kwar to pu'dki'd mo dhali cik gwo jin su'kkina uni ka rem 'kup mo. Dhali mmonyitha a'di ki a'di thokki uni gwo ki 'bore/ mo tani a'di ki dot a'di gwo mo ki: Gwoŋkan jana jin 'kwaru si'da/ jin ta jin twa/a/ ki tiya 'baar mo?

29 Yesus ki thok a'di gwo mo ki: Jin twa/a/ a'dihe/ be jin o gwo mo ki: Ciki um gwo mo ma. Ayy, um 'Kwani ma Israyiil mo. Tapa Arungimis bana a'di ta Tapa Arungimis jin tal 'de/ mo be.

30 Dhali /e mini en Tapa Arungimis pini ka dum pini 'baar mo dhali ka kashiram pini 'baar mo dhali ki bwam pini 'baar mo dhali ki 'bi'th pini 'baar mo.

31 Dhali jin 'ko'da 'dihe/ mo be: /E mini en amannyak ca'b pini me'd is piniŋ gana/ mo be. Gwoŋkana kamu/ jin 'kwarkunu mo yisa di'da jin ca'd mmobol yansan e mo.

32 Dhali aman'kwar to mo a'di ki o a'di gwo mo ki: /E o gwoŋ gana/ mo, Amantor Gwo. /E tori gwo ki tor gana/ ki a'di tal 'de/ mo, haali/ jan kamu/ yisa di'da, hili a'di 'de/ mo be.

33 Mmo/en a'di ka du 'baar mo dhali ka du jin mishi gwo 'bani 'baar mo dhali ki mom'bithi 'baar mo dhali mmo/en amannyak ca'b pini me'd is piniŋ gana/ mo tani a'di boli to 'baar mo e gun cinu mo mmoči'th ki o'd mo dhali kun 'donu mo mmomiiya bas mo be.

34 Dhali ka Yesus mishki'd ki a'di thokki a'di gwo ki 'bore/ mo tani a'di ki o a'di gwo mo ki: /E yisa si'dkina 'peni Bampa/ ma Arungimis mo. Dhali 'peni mo yan mo tani wathin 'deŋ kamu/ yisa di'da jin ro'dki mii mo mmodot a'di gwondoŋa kamu/

mo be.

*Gwo gi Dotu gom Ya/ ma Dawuu'd mo*

<sup>35</sup> Dhali ka Yesus di'd mo mmotor uni gwo mo e gu'b gi mondheleladhelel mo tani a'di ki o uni gwo mo ki: Kata i/ona iman'kwar to mo ka Kristhos ta Ya/ ma Dawuu'd moye?

<sup>36</sup> Haala Dawuu'd ki is piti mmoshi/irrkunu a'di ki Shi/in Dheleladhelel mo tani a'di o gwo eya tente/ mo ki:

Tapa o Tapam pem gwo mo ki:

'Ca'bi /e aha/ ki me'da bim poros pem mo

ntagi aha/ mina dhu 'kup pini mo e bwan 'kwariny cwa jin dhuna /e sho'k mo.

<sup>37</sup> Dawuu'd ki is piti ki yuk a'di ki Tapa mo. Wakan a'di midi ta ya/m piti kata mo dok/e? Dhali adhana waambuhany 'kwani cikki gwo 'peni a'di ki bwan 'kunya/ mo be.

*Yesus Be'dki Gwo gom Mii gi Iman'kwar To mo*

<sup>38</sup> Dhali e gwom piti jin tora a'di uni mo tani a'di ki o uni gwo mo ki: Jiyi iman'kwar to ki e ki 'bore/ mo uni gun eni moman'as ki burrinyen turga/ i is mo dhali kun eni mo jin takuwa tak ka rem 'kup e mo ma suug mo

<sup>39</sup> dhali mmobu'th mo kun 'boron e gu'b gi montul is mo dhali mo kun takuwa tak mo e mo jin yukuwa yuk mo,

<sup>40</sup> uni gun loski gu'b gi up gun wuna ikath ki 'kolo'c mo dhali uni gun miiki mon'tho mo eya por ma pije/ mo ki rash rash mo. Uni mini bu'th dhan miiwak jin bol kun tiya e mo be.

*A'bom jin Wun ma Kath jin Ci To mo*



<sup>41</sup> Dhali a'di ca'bki'da 'cesh ka par 'twa/ e mo jin dhunuwa guurush mo dhali a'di parki'da waambuhany 'kwani e mo mmodhuna uni aguurush e mo jin dhunuwa guurush mo. 'Kwani tana ris ka ris kun ta pa ki pa mo kun dhukina dhana guurush mo.

<sup>42</sup> Dhala 'bom jin wukin ma kaḥim piti mo pu'dki'd mo dhali a'di ki dhu ushi emena guurushi su/ mo kun ta gi 'per mo, uni gun wana e ka tariipan 'de/ mo be.

<sup>43</sup> Dhali a'di ki yuk imancik a'di gwo e a'di mo dhali o uni gwo mo ki: Ka jin gana/ aha/ ona um gwo mo ki, a'boma ha'th'ko'd yansan jin wun ma kaḥim piti mo tani a'di dhuki'da ris tom piti 'baar mo mmobol uni gwansan e mo kun ta'kki to mo e mo jin dhunuwa guurush mo be.

<sup>44</sup> Haali/ uni 'baar mo ta'kki to mo 'peni tom buni gun ishkin ka enthus mo. Hili ayim 'pena ha'th'ko'd piti mo tani a'di dhuki'da ris to 'baar mo kun tana a'di mo gun mini 'taki kar a'di mo be.

## 13

*Mo gi 'Ce'du Gu'b gi Mondheleladhelel Sho'k mo dhali Jamas Mii jin Toru Itwa/a/ mo gom 'Pemen jin 'Ko'd mo*

<sup>1</sup> Dhali me'd jin yakina a'di ka pije/ mo 'peni gu'b gi mondheleladhelel mo tani jan 'derj kamu/ 'peni imancik a'di gwo mo o a'di gwo mo ki: Hili mo mo ma, Amanṭor Gwo. Wosh gwahan wani jaro/ jarowa dhali monyangi gu'b gwahan wani jaro/ jaro/ mo!

<sup>2</sup> Dhala Yesus ki o a'di gwo mo ki: /E mishi dhan mii gi gu'ba caaga/ gwansan kun nyanḡunu

mo? Hili wosha ƚal 'denj kamu/ yisa midi di apowa kamuŋ kamu/ mo jin minu 'koki ƚa'k a'cesh mo be.

<sup>3</sup> Dhali me'd jin ƚa'bkina a'di e 'kuwosh Setuun jin di'd ka par 'twa/ ki gu'b gi mondheleladhelel mo tani Buterus dhala Yakuub dhala Yohaana dhala Andaraawus dotki a'di gwo ka kwal is mo ki:

<sup>4</sup> Tori aman gwo mo ma, ki mii gwansan mini pu'd kakasja mo? Dhali ki jamas mii kun wakat-inta imina to gwansani 'baar mo mmothim mo mo?

<sup>5</sup> Dhala Yesus ki ƚel mii 'pen mo dhali o uni gwo mo ki: 'Cunycuri mii ki is bum ki 'bore/ mo ma, ki jan ƚal 'denj kamu/ midi diki sus um mmodheres mo.

<sup>6</sup> 'Kwani tana ris ka ris mini iiyu/ ki gway pem mo mmo/o gwo mo ki: Aha/ tana a'di mo. Dhali uni mini sus tiya ka ris mmodheres mo be.

<sup>7</sup> Dhali ki um mini cik gwo gom mo/as mo dhali gom gwo jin 'ce'du 'te/ mo gom mo/as mo tani dhalku/ is ki anan mo. Gom to gwansan mini mii pu'du/ mo. Hili 'pemen yisa minu thim naskina/ mo.

<sup>8</sup> Haali/ kala kamu/ midi cu mis apo/ kala kamu/ mo dhali 'penkuman bampaŋ kamu/ midi cu mis apo/ 'penkuman bampaŋ kamu/ mo. Dhali adhan mony'cesh midi yikin is ki mo ka ris mo dhali ƚe/ midi di mo si'da/. Hili mii gwansan uni ita jasi montel 'pen ki isa nyor mo be.

<sup>9</sup> Hili 'cunycuri mii ki is bum ki 'bore/ mo ma. Haali/ uni mini ci um mo e montul is mo dhali um minu dor mo e gu'b gi montul is mo dhali um mini doshi bwambor imudhiir mo dhali imalik mo gom gway pem mo mmoçi gwo ibwambori uni mo be.

10 Dhali gwom 'borga/ minu mii ciki kal gi 'kwaniny'ceshi 'baar mo ntwa/a/ mo be.

11 Dhali ki uni mini sus um mo e mo jin dwallu gwo mo dhali ci um wakan mo tani dhalku/ is ki anan mo ntwa/a/ mo gom gwo jin mina umi o mo. Hili oyi a'diyin jin minu ci um ki mo yansan mo haali/ a'di diki ta um kun mini o gwo mo, hili Shi/ in Dheleladhelel mo be.

12 Dhala kama kamu/ midi ci akam piti mmo'kosh jwa mo dhali com midi ci ya/ ki 'bwa/ ilu/ mo mmo'kosh mo dhali uci mini cu mis apo/ ikum mo dhali uni mini dhu uni mmowu mo be.

13 Dhali um minu shi/i e ki 'kwani ka ris mo gom gway pem mo. Hili a'di jin midi 'dim 'kup mo ntagi 'pemen mo tani a'di iminu iwot̄h mo be.

14 Hili ki um mini par a'di jin ta mii jin bulabul e mo, a'di jin thumu mo e mo jin mina a'di ka 'taki diki di mo ba/ tani (dhalka mandeɲ gwo e mishi gwo 'ban mo) dhali yan'ko'd uni gwansan kun 'kon e Pa Yahuudiyya mo tani dhalki uni soni 'kuwosh mo ma.

15 Dhali dhalki a'di jin di'di 'kuŋgu'b midi diki thul ka 'cesh mo walla ciɓ gu'b piti mo mmogu toɲ kamu/ mo.

16 Dhali dhalki a'di jin di'd e bwam bunto midi diki doku/ ka nyaɲ'ko'd mo mmogu burriɲem pom piti mo be.

17 Dhali ayy/ ayy/ ayy gom uni gwansan kun bwaa uci mo dhali gom uni gwansan kun ci uci ako mmopi ka tee gwansan mo.

18 'Thoyi mo ma ki a'di midi diki pu'du/ mondit mo.

19 Haali/ ka cim gwansan mo tani mont̄o'c bwa

midi di jin diki di wakan mo 'peni ka muṅ'kup mo me'd jin uḱ ma Arumgimis to mo ntagi shwane/ mo ba/, dhali midi diki di ki sule/ sule/ mo be.

<sup>20</sup> Dhali waḱki/ Tapa midi 'taki diki 'ciṯha/ cim gwansan bwa mo tani buye/ wathimpaṅ kamu/ minu 'taki 'koki woṯh mo be. Hili gom gway gi uni gun kwanykunu mo, uni gun kwanykina a'di mo tani a'di i'ciṯhuwa cim bwa mo be.

<sup>21</sup> Dhali waḱki/ wathin 'deṅ kamu/ midi o um gwo mo ki: Hili mo mo ma, aKriṯṯhos a'dan mo, walla, Hili mo mo ma, a'di aḱiṯṯaan mo tani dhalki gwom piti ki gam is mo.

<sup>22</sup> Haali/ iḱriṯṯhos kun 'koki ta kuṅ gana/ mo dhali imanḱi gwonthus mini cu mis mo dhali ṯor dhan jamas mii mo dhali dhan momer mo mmo-susa susi dheres mo, waḱki/ a'di mishu mii si'da/ gom uni gun kwanykunu mo be.

<sup>23</sup> Hili 'cunycuri is bum ki 'bore/ mo. Aha/ ṯorkina um aris to gwansani 'baar mo nṯwa/a/ mo be.

*Mo gi Mina Ya/ gi 'Kwani Pu'du/ mo*

<sup>24</sup> Hili ka tee gwansan mo 'ko'di monṯo'c bwa mo tani atente/ midi dhurum mo mo dhali appe midi diki ḱi monḱush piti mo be.

<sup>25</sup> Dhali arisa culi 'baar mo mini ṯa'k mo 'peni momis mo dhali mom'bi'th kun 'kon e momis mo tani minu pir is mo be.

<sup>26</sup> Dhali yan'ko'd uni mini par Ya/ gi 'Kwani e mo mmopu'du/ mo e bwaaraḱ ka dhan mom'bi'th mo dhali ki monyca mo be.

<sup>27</sup> Dhali yan'ko'd a'di midi hash iman'doyu gwom piti mo dhali tul kum piti is kun kwanykunu mo 'peni mony'cesh kun 'kona shem 'pena bi

idonon mo 'peni mo jin din ma 'cesh 'kup mo ntagi mo jin dina momis 'kup mo be.

28 'Peni gwo gi cwampu/ da/ari a'di mo dhali mishi miim piti mo. Me'd jin lu/kina a'di abim piti mo mmo'ta'dama'ta'dam mo dhali dhu jipin this mo tani um ki mish mo mo ki moyurantee 'dishi'd mo be.

29 Wakan si'da/ wakki/ um ki par aris to gwansan e mo mmobu'th mo mo tani um ki mish mo mo ki a'di 'dishki'd mo, e 'twanƙal hila/ mo be.

30 Ka jin gana/ aha/ tora um gwo mo ki 'kwani ma nyakum yil gwansan mini 'koki pe mo ntwa/a/, ntwa/a/ ka ris to gwansan mini bu'th mo mo be.

31 Momis dhali mony'cesh mini pe mo tani hili gwom pem midi diki pe mo be.

32 Hili ka tente/ caan mo walla ki mo caan mo tani a'di dina wathin tal 'deƙ kamu/ ki mish mo walla iman'doyu gwo kun 'kon e momis mo walla Ya/ si'da/ mo, hili jasi Com a'di 'de/ mo be.

33 'Cunycuri is bum ki 'bore/ mo ma dhali timi mo mo ma dhali 'thoyi mo ma, haali/ um 'koki mish mo mo atente/ jin mina mo pu'du/ mo be.

34 A'di mina e waki wathi/ jin ya yilkina/ mo. Me'd jin dhalkina a'di pam piti 'pen mo tani dhali a'di dhu cinƙinam piti mo mmohil mo mo isi ka tu'c piti ka 'deƙe/ 'deƙe/ mo. Dhali a'di ki kan amantim 'twanƙal gu'b gwo mo mmotim mo mo be.

35 Timi mo mo ma wakan - haali/ um 'koki mish mo mo jin mina com gu'bi pu'du/ mo. A'di wari midi ta mom'pimpili/ mo walla mombwam/e mo walla mo kun gwon ma dhongola nwa mo walla mon'thamo/ mo.

<sup>36</sup> Hili isi ciki/ a'di midi pu'du/ ki jahanne/ mo dhali gam um ki um mala e mo be.

<sup>37</sup> Dhali a'di jin tor̄ka/ um mo tani miga/ tor̄ ki 'kwani 'baar mo ki: Timi mo mo ma.

## 14

*Imanshu 'Kwani Bway Miikina Wu'th apowa Yesus mo*

<sup>1</sup> Dhali acim bockini su/ ntwa/ a/ ka cim gi Mompe'kupanyolos mo dhali ayuk̄ jin tulu 'kup mo gi maan̄kuthu'd jin miinu ki dar ga cumat̄ mo. Dhali igasiis kun can dhali iman'kwar to mo uni n̄apki bway mo mmobu'th a'di ki kup mo dhali 'kosh a'di jwa mo

<sup>2</sup> haali/ uni o gwo mo ki: Yisa ka tul 'kup yan jin yukuwa yuk̄ mo yisa hili isi ciki/ adulatt̄ mina 'kwani ishwa mo be.

*Yesus A'di 'Koshkunu Is ka Yina Pi'dnan̄ Gana/ mo e Pam Beet̄aniya mo be*

<sup>3</sup> Dhali ki a'di diki'd e Pam Beet̄aniya e gu'b ma Simaan jin 'kosha monthus mo tani ki a'di ca'bki'da tharabeesa mo tani a'boma kamu/ pu'dki'd mo jin taki'd gi turan̄ gasaas jin ta gi kush mo jin din ma yina pi'dnan̄ gana/ nycine/ mo, jin 'bitha yol she/ ki 'bi'th mo. Dhala yim ki 'ce'd tura mo dhali wol a'di e 'kup ma Yesus mo be.

<sup>4</sup> Hili 'kwanin tiya 'kokini mun mo kun dekk̄in ma nyor mo e is buni mo mmo/o gwo mo ki: Atinta shinu ayina pi'dnan̄ gana/ yan isa 'cesh kan mo?

<sup>5</sup> Haali/ ayina pi'dna/ yan minu 'taki yol ka riyaal iss 'kwanimpa ka 'kume'd mo dhali ciki 'kwani

kun hatha'ko'd mo. Dhali uni ki ruḵa yim ki gwo mo be.

<sup>6</sup> Hila Yesus o gwo mo ki: Dhalka yim mo ma. Atinta ṭoca um ayim bwa mo? Ayim miiki tony jaro/ gom aha/ mo.

<sup>7</sup> Haali/ um isa yempa/ um tan gi 'kwani kun hatha'ko'd kun nyak'ko ki um mo, dhali ki yilan tiya jin ona bwa um mo tani um ki mish uni tom 'boron mii mo. Hili um mini 'koki ta gi aha/ isa yempa/ mo.

<sup>8</sup> Ayim mii a'di jin misha a'di mii mo. Ayim 'koshki aha/ bungwar is pem nṭwa/a/ mo gom kan jin minu kan aha/ mo be.

<sup>9</sup> Dhali ka jin gana/ aha/ ṭora um gwo mo ki: E mo yin jin minu ci gwom 'borga/ e mony'ceshi 'baar mo tani a'di jin miikin ma yim mo tani minu ṭor mo mmokaa yim e mo be.

*Yahuusa A'di Gamki Gwo Me'd mo Mmo'ciṭha/  
Yesus Is ki Gwo mo*

<sup>10</sup> Dhali yan'ko'd Yahuusa Iskariyuuti a'di jin 'dap tiya 'twa/ ka 'kume'd i'ce'dka su/ mo tani a'di yaki'd mo e igasiis kun can mo mmothoson gwo mo mmo'ciṭh a'di is ki gwo mo e uni mo be.

<sup>11</sup> Dhali ki uni cikki gwo mo tani uni 'kunya bwa ki 'kuny mo dhali o gwo is mo mmoçiki a'di aguurush mo. Dhali a'di ṇapki embula 'borgan gana/ mo mmo'ciṭh a'di is ki gwo mo be.

*Yesus Shwaki Tonte/ jin 'Ko'd Nyakki Imancik  
A'di Gwo mo*

<sup>12</sup> Dhali ka cim jin ṭwa/a/ gi maanḵuthu'd jin miinu ki dar ga cumat mo ki uni 'ciṭhki ari ka'bal 'kus mo gom Mompe'kupanyolos mo tani imancik

a'di gwo oki a'di gwo mo ki: Ki mana o /e bwa jin mina aman ii mo dhali thoson to mo gom /e mo mmoshwa ki Mompe'kupanyolos mo?

13 Dhali a'di hashki imanciḱ a'di gwo isu/ mo dhali o uni gwo mo ki: Iiku/ i dhan 'penkuman bampa/ mo dhali wathi/ jin kali dhan dhur yi'de/ midi gam um 'kup mo. Bathi a'di nsho'k mo ma.

14 Dhali e mo yin jin mina a'di ciḱ mo tani oyi com gu'b gwo mo ki: Amantor Gwo o ki: Mane gu'b jin midi ta gu'b yilkina/ gom aha/ mo jin miga/ shwa to ka cim gi Mompe'kupanyolos nyakki imanciḱ gwom pem mo?

15 Dhali a'di midi tor um adhan gu'ba beega/ mo jin nyanju ka makampo/ apowa kamu/ mo, jin isha to ki korom korom mo dhali jin thosonkunu mo. E mun mo tani thosoni to mo ma gom ana mo.

16 Dhali imanciḱ a'di gwo iikin mo dhali pu'd mo e 'penkuman bampa/ mo dhali gam a'di me'd jin torcina a'di uni gwo mo. Dhali uni thosonki to mo gom Mompe'kupanyolos mo be.

17 Dhali ki mo ta mom'pimpili/ mo tani a'di pu'dki'd nyakki kum piti kun 'koni 'kume'd i'ce'dka su/ mo.

18 Dhali ki uni 'kokina tharabeesa mo mmoshwa to mo tani Yesus ki o gwo mo ki: Ka jin gana/ aha/ tora um gwo mo ki: Jan tal 'de/ 'peni um midi 'ciḱ aha/ is ki gwo mo, a'din 'de/ jin nyakki to shwa ki aha/ mo be.

19 Dhali uni telki mii 'pen mo mmokal bwani di'ti'd mo dhali o a'di gwo mo ka bathi 'pen ka rem 'kup mo ki: A/aha/ 'taa?

20 A'di ki o uni gwo mo ki: A'di ta jin tal 'de/ 'peni um kun 'koni 'kume'd i'ce'dka su/ mo, a'di jin



'thupki maanj<sub>k</sub>uthu'd nyak<sub>k</sub>i aha/ eya sahana 'de/ mo be.

<sup>21</sup> Haali/ Ya/ gi 'Kwani yaki'd mo me'd gwo jin 'kwarkunu mo gom a'di mo, hili wayyi e wathi/ jin 'cith<sub>k</sub>i Ya/ gi 'Kwani is ki gwo mo. A'di midi 'taki 'bor ki isi 'bor gana/ mo gom wathi/ yansan mo wakki/ a'di minu 'taki 'koki dho'th mo be.

<sup>22</sup> Dhali ki uni 'kokin mo mmoshwa to mo tani a'di ki bu'th maanj<sub>k</sub>uthu'd mo dhali 'bora 'bor bwa i is mo dhali 'ce'd a'di mo dhali ciki uni mo dhali o gwo mo ki: Budhi a'di yansan mo ma. A'di ta is pem mo be.

<sup>23</sup> Dhali a'di ki budha kubbaaya mo, dhali ki a'di ciki mom'bora 'bor bwa i is mo tani a'di ki ciki uni mo dhali uni 'baar mo piki a'di mo be.

<sup>24</sup> Dhali a'di ki o uni gwo mo ki: A'di yansan ta'da abas pem gi gwo jin gamu me'd jin ta jin this mo a'di jin wolki'd gom 'kwani ka ris mo be.

<sup>25</sup> Ka jin gana/ aha/ tora um gwo mo ki aha/ mina diki pi yiman maman cwa dok/e mo ntaga tee jin miga/ pi a'di jin ta jin this e Bampa/ ma Arungimis mo be.

*Mo jin Wat ma Buterusa Yesus Gway A'di Torkunu Itwa/a/ mo*

<sup>26</sup> Dhali ki uni yukki gway mo tani uni iikin ka pije/ mo e 'kuwosh Setuun mo.

<sup>27</sup> Dhala Yesus ki o uni gwo mo ki: Umi 'baar mo mini ta'k mo. Haali/ a'di 'kwarkunu mo ki: Aha/ mina 'kosha manhil ka'bal mo dhali ka'bal minu cecker bwa mo be.

<sup>28</sup> Hili n'ko'd mo tani ki aha/ minu cuyu mis mo dok/e tani aha/ mina ya itwa/a/ ki um e Pany Jaliil mo be.

29 Buṭerus ki o a'di gwo mo ki: Bahili wakki/ uni gwansani 'baar mo mini ta'k mo tani aha/ mina diki biṭ mo be.

30 Dhala Yesus ki o a'di gwo mo ki: Ka jin gana/ aha/ tora /e gwo mo ki mon'thiny yansan shwane/ mo ntwa/a/ ka dhongola ṅwa diki ko e me'di su/ mo naskina/ tani /e mini waṭ aha/ gway me'di kwara mo be.

31 Hili a'di oki gwo ka du jin daradar mo ki: Wakki/ aha/ mina mii wu mo nyaḱki /e mo tani aha/ mina diki waṭ /e gway mo. Dhali uni 'baar mo nyaḱki o 'twan tal 'de/ mo be.

*Yesus 'Thoki'd e Monsinu jin Ta Bwaagon ma Jathsemaani mo*

32 Dhali uni iikin mo e mo jin yuku gway ka Jathsemaani mo. Dhali a'di ki o imanciḱ a'di gwo gwo mo ki: 'Koyi imahan mo ma. Aha/ ki ya mo dhali 'tho mo.

33 Dhali a'di ki susa Buṭerus mo dhala Yakuub mo dhala Yohaani mo dhali mii ma cis telki a'di 'pen mo mmobu'th a'di kagahara mo dhali bwa jin tocu 'kus si'da/ mo be.

34 Dhali a'di ki o uni gwo mo ki: Akashiram pem diṭa bwa ki diṭ kagahara mo, ma isi kan mmowu moyi. 'Koyi imahan mo ma dhali timi mo mo mmo'ko ki e i'kup mo.

35 Dhali mmoyakina a'di mo mmothoth is ari'ceenne/ mo tani a'di biṭki'da 'cesh mo dhali 'tho mo wakki/ a'di minu 'taki mish mii mo tani ki mo yan midi 'taki ya pe a'di mo.

36 Dhali a'di o gwo mo ki: Abba Ababa. Aris to 'baar mo mishu mii ki /e mo. Kalka kubbaaya yan

'peni aha/ mo ma. Hili a'di yisa jin oyaa/ bwa, hili a'di jin ta bwam pini mo be.

<sup>37</sup> Dhali a'di pu'dki'd mo dhali gam uni ki uni ishki e mo dhali a'di ki owa Buterus gwo mo ki: Simaan, A/e ishki e kan mo? Bunya/ mina /e diki tim mo mo ka tenten 'de/ mmodi ki e i'kup mo?

<sup>38</sup> Timi mo mo ma dhali 'koyi ki e i'kup mo dhali 'thoyi mo, ki um mini 'koki ciç mo e mo jin palu mo. Shi/in ka jin gana/ a'di ona bwa mo tani hili bungwar is a'di ihatha'ko'd ki ha'th mo be.

<sup>39</sup> Dhali dok/e a'di yaki'd mo dhali 'tho mo mmorash jasi gwon tal 'de/ e mo.

<sup>40</sup> Dhali dok/e a'di pu'dki'd mo dhali gam uni ki uni ishki e mo haali/ em buni to'dki uni is mo dhali uni 'koki mish gwo jin mina uni thok a'di mo be.

<sup>41</sup> Dhali me'di kwara mo dok/e tani a'di pu'dki'di uni mo dhali o uni gwo mo ki: A/um 'kon mo mmo/ ish e kan mo dhali bu'th mosi/is bum mo? A'di 'koshi jwa mo ba/. Mo pu'du'd mo. Ya/ gi 'Kwani a'di 'cithkunu is ki gwo mo e me'd gi 'kwani kun ta imanmii miinthus mo be.

<sup>42</sup> Cuyi mis mo. Dhalki ana iina mo. Hila uma? Aman'cithaa/ is ki gwo pu'dki'd hila/ mo be.

*Mo jin 'Cithuwa Yesus Is ki Gwo mo dhali Mo gi Budhu A'di mo*

<sup>43</sup> Dhali ki jahanne/ ki a'di di'di mmo/o gwo mo naskina/ mo tani Yahuusa pu'dki'd mo, a'di jin 'dap tiya 'twa/ ka 'kume'd i'ce'dka su/ mo dhali a'di suski'da waambuhany 'kwani nyakki a'di mo ki gandala turga/ ime'd mo dhali cwa mo, 'peni igasiis kun can mo dhali iman'kwar to mo dhali 'kwanin gwanyjaka/ mo be.

44 Dhali a'di jin 'cithki a'di is ki gwo mo çiki uni jamas mii mo mmo/o gwo mo ki: Jan tal 'de/ jin miga/ pi 'twa/ mo tani a'di ta wathi/ mo. Budhi a'di mo dhali susi a'di ki 'dantar mo.

45 Dhali ki a'di pu'dki'd mo tani a'di ki ya a'di ki jahanne/ mo dhali o a'di gwo mo ki: Tapa. Dhali a'di ki pi a'di 'twa/ mo be.

46 Dhali uni 'baar mo ki dhu me'd buni apo/ a'di mo dhali bu'th a'di mo.

47 Hili jan tal 'deŋ kamu/ 'peni uni gwansan kun doshkin ki 'dishe/ mo tani a'di ki buk gandala turgam piti mo dhali ruḥun çinƙina/ ma gasiis jin ca'd mo dhali 'cith a'di 'cem piti mo be.

48 Dhala Yesus ki o uni gwo mo ki: A/um iiyin ka pije/ mmobu'th aha/ ki gandala turga/ ime'd mo dhali ki cwa mo, me'd mii jin miinu apo/ wathin 'di/ mo?

49 Ka tee kun bathani 'ko'd mo tani aha/ dikina mo e gu'b gi mondheleladhelel mo mmoṭor um gwo mo dhali um 'koki bu'th aha/ mo be. Hili dhalki Gwo jin 'kwarkunu mo thimu mo.

50 Dhali uni 'baar mo dhalki a'di me'd mo dhali so mo be.

### *Wathin Dhuru'c jin Guski'd mo*

51 Dhali wathin dhuruca kamu/ bathki a'di nsho'k mo ki dar gi toŋ kamu/ i is mo, jasi burrinyen dhiny e jin 'kamkina a'di i is mo, dhali uni ki bu'th a'di mo.

52 Hili a'di dhalki burrinyen dhiny e mo dhali gus is 'te/ mo ki jasi burrinye/ jin hitha a'di i empa'd mo be.

*Yesus Doshki'd mo e Bwambor gi Montul Is gi 'Kwani Yahuuda/ mo*

53 Dhali uni ki susa Yesus eya gasiis jin ca'd mo. Dhali igasiis kun cani 'baar mo dhali 'kwaniḡ gwanyjaka/ mo dhali iman'kwar to mo uni tulki is mo be.

54 Dhala Buterus bathki a'di nsho'k 'pena dhana/ mo. A'di ki ya ki sule/ e bwaagon ma gasiis jin ca'd mo. Dhali a'di ki nyak ca'b ki imanji mo mo dhali sam is piti i o'd mo be.

55 Dhali igasiis kun can dhali 'kwani gi montul is buni 'baar mo uni ḡapki gwo mo mmo/o apowa Yesus mo mmokar a'di mmowu mo tani hili uni 'koki gam ton tal 'denj kamu/ mo be.

56 Haali/ 'kwani tana ris ka ris kun 'ce'dki a'di gwo apo/ mo dhali gwom buni gun 'ce'dkina uni a'di i is mo tani uni 'konuki gam me'd mo be.

57 Dhali kun tiya doshkin ki mis mo dhali 'ce'd a'di gwo apo/ mo mmo/o gwo mo ki:

58 Aman cikkina gwo jin ona a'di mo ki: Aha/ mina 'kosh gu'b gi mondheleladhelel yansan mo, a'di jin nyanjunu ki me'd mo, dhali ka cim kwara mo tani aha/ mina nyanj jan kamu/ jin 'konuki nyanj ki me'd mo be.

59 Isi gwom buni jin 'ce'da uni kan mo tani yisa gamu me'd mowa.

60 Dhala gasiis jin ca'd doshki'd ki mis mo e bwaman uni mo dhali doṭa Yesus gwo mo ki: A/e bunya/ diki 'de'k 'twanj kamu/ mo mmothok gwo kana? Gwo gi wakatinta i/ona 'kwani gwansan apo/ /e mo?

61 Hili a'di ca'bki'd ki shwam mo dhali yisa thok 'twanj kamuwa. Dhala gasiis jin ca'd dok/e ki doṭ a'di gwo mo ki: A/e tana Kristhos jin ta Ya/ gi A'di jin Manu mowa?

62 Dhala Yesus ki thok a'di gwo mo ki: Aha/ tana a'di mo, dhali /e mini par Ya/ gi 'Kwani e mo mmoča'b ka bim poros gi mom'bi'th mo dhali mmodoku/ ka nyan'ko'd mo e bwaarak 'peni momis mo be.

63 Dhala gasiis jin ca'd dherki burrinyem pom piti bwa mo dhali o gwo mo ki: Katinta icorkina ana gwo mo jin minu mii o mo?

64 Um cikki a'di walki gwo sor mo. Gwo jin gama um me'd mo wakata mo? Dhali uni 'baar mo wakki a'di mo mmo/o ki a'di ha me'd mmowu mo be.

65 Dhali kun tiya telki mii 'pen mo mmo'tak a'di manya/ i is mo dhali mmokum a'di bwam/em piti mo dhali dor a'di mo mmo/o gwo mo ki: Oyi gwo is mo ma. Dhali mmodora uniya dor ki me'd buni mo tani uni kun ta imanji mo mo bu'thki a'di mo be.

### *Buterus Watki'da Yesus Gway mo*

66 Dhala Buterus diki'd ka lungu'b mo e bwam ma gon mo, dhali nyarany cin<sub>h</sub>kinan 'den kamu/ 'peni jim ma gasiis jin ca'd mo tani a'di pu'dki'd mo.

67 Dhali mmonyithkina a'diya Buterus mo mmosam is piti i o'd mo tani ayim ku'thki a'di ki e mo dhali o gwo mo ki: /E si'da/ nyakki di ki wathi/ gi Pa Naasira yan jin ta'da Yesus mo.

68 Hili a'di watki gwo mo mmo/o gwo mo ki: Aha/ mola a'di mo walla 'pemen gwom pini jin ona /e mo tani a'di molka/ 'ban mo. Dhali a'di ki ya ka pije/ ki 'twankala lambalany mo. Dhala dhongola nwa gwoki'd mo be.

69 Dhali nyarany cin<sub>h</sub>kina/ parki a'di e mo dhali tel mii 'pen mo mmo/o a'di gwo mo dok/e e uni

gwansan kun doshkin ki 'dishe/ mo ki: Wathi/ yansan ta jan tal 'de/ 'peni uni mo be.

<sup>70</sup> Dhali dok/ e a' di waṭki gwo mo. Dhali yan'ko'd dok/ e ari'ceenne/ mo tani uni gwansan kun doshkin ki 'dishe/ mo tani ona Buterus gwo mo ki: Ka jin gana/ /e ta jan tal 'de/ 'peni uni mo haali/ /e ta ji gi Pany Jaliil mo be.

<sup>71</sup> Hili a' di ṭelki mii 'pen mo mmojee is piti jwa mo ki gwo jin thulkina a' di me'da po/ mo, mmo/o gwo mo ki: Aha/ dinaki mish wathi/ yan mo, a' di jin okina um mo.

<sup>72</sup> Dhali ki jahanne/ adhongola ṅwa gwoki e me'di su/ mo. Dhala Buterus kana gwo e mo, ma gwo yin jin on ma Yesus a' di mo ki: Nṭwa/ a/ ka dhongola ṅwa diki ko e mo me'di su/ mo tani /e mini waṭaha/ gway me'di kwara mo. Dhali ki a' di di'd mmoka gwo e 'baar mo ka bath 'pen mo tani a' di 'tul ma du mo dhali a' di gwoki'd ki jabu'th mo be.

## 15

### *Yesus Doshki'd Ibwambor ma Bilaatus mo*

<sup>1</sup> Dhali ki jahanne/ ki mo ta mon'thamo/ mo tani igasiis kun can mo dhali 'kwaniṅ gwanyjaka/ mo dhali iman'kwar to mo dhali aris 'kwani gi montul is buni mo tani uni tulki is mo mmoganan gwo 'kup mo. Dhali uni ki deka Yesus mo dhali sus a' di mo mmoçika Bilaatus mo be.

<sup>2</sup> Dhala Bilaatus ki doṭ a' di gwo mo ki: Ki /e de itana malik gi 'Kwani Yahuuda/ mo de? Dhali a' di ki thoḵ a' di gwo mo ki: /E si'da/ on wakansan mo be.

<sup>3</sup> Dhali igasiis kun can uni yerki a' di is ki gway ki to ka ris mo.

<sup>4</sup> Dhala Bilaat<sub>us</sub> ki dot a'di mo dok/e ki: /E bunya/ mini diki thok 'twaŋ kamu/ mo 'taa? Hili ma, ama'diny gwo wana risa kun okina uni apo//e mo.

<sup>5</sup> Hila Yesus diki thok a'di gwon tal 'deŋ kamu/ mo. Gom mii gi wakan mo tani aBilaat<sub>us</sub> merki'd mo be.

*Yesus Torkunu Gwo 'Twa/a 'Cesh mo Mmowu mo*

<sup>6</sup> Dhali ki mii jin tuluwa tul 'kup mo tani miim piti isa yempa/ ta mii mmo'cu<sub>kk</sub>i uni jan 'de/ 'peni 'kwani habuus mo a'di jin dotkina uni mo be.

<sup>7</sup> Dhali wathi/ di'd jin yuk<sub>k</sub>unu gway ka Baraabas mo jin diki'di bwam uni eya sijin mo, a'di jin 'koshki'da mee mo e mii jin miinu gom gwo jin onuwa 'cesh gom bampa/ mo be.

<sup>8</sup> Dhala waambuhany 'kwani pu'dkin mo dhali tel mii 'pen mo mmodota Bilaat<sub>us</sub> gwo mo mmomii to jin miina a'di isa yempa/ gom uni mo.

<sup>9</sup> Dhali a'di ki thok uni gwo mo ki: Um ŋapki aha/ mmo'cu<sub>kk</sub>i um aMalik gi 'Kwani Yahuuda/ mo 'taa?

<sup>10</sup> Haali/ a'di nyithki dhapan jin takina igasiis kun can mo gom a'di mo mmo<sub>ci</sub> a'di wakan mo.

<sup>11</sup> Hili igasiis kun can ci'thkina waambuhany 'kwani is ki mii mo ki a'di midi 'cu<sub>kk</sub>i uni aBaraabas mo 'te/.

<sup>12</sup> Dhala Bilaat<sub>us</sub> ki o uni gwo mo dok/e ki: Dhali aha/ mina miya ta ki wathi/ jin yu<sub>ka</sub> um ka Malik gi 'Kwani Yahuuda/ mo?

<sup>13</sup> Dhali uni cu<sub>kk</sub>in kagahara mo dok/ e ki: 'Koshi a'di ki cwany'ci<sub>th</sub>an dhul mo.

<sup>14</sup> Dhala Bilaat<sub>us</sub> ki thok uni gwo mo ki: Gomat-inta sa/? Tonthus gi wakatinta imiikina a'di mo?



Hili uni 'baar mo kumki cuuwa/ mo ki nyanye/ mo mmo/o gwo mo ki: 'Koshi a'di ki cwany'cithan dhul mo.

<sup>15</sup> Wakan Bilaatus mmodikina a'di gwo ibwa mo mmoteya waambuhany 'kwani ki gwo mo tani a'di ki 'cukki uni aBaraabas mo dhali ki a'di dorki'da Yesus ki yis bip mo tani a'di ki ciki a'di ki uni mo mmo'kosh ki cwany'cithan dhul mo be.

*I/askar Miikina Yesus ka Mak mo*

<sup>16</sup> Dhali i/askar ki sus a'di mo e bwam mo ma mudhiir mo, a'di jin ta gu'b jin ca'ba a'di nycine/ mo. Dhali uni ki yuk i/askari 'baar mo ka tul 'kup mo.

<sup>17</sup> Dhali uni ki hi'thki a'di burrinyen duk is mo jin ta jam po/ mo dhali uni ki to'd ton'kup 'pena 'de/ mo mmokar a'di i'kup mo be.

<sup>18</sup> Dhali uni ki tel mii 'pen mo mmothe a'di me'd mo mmo/o gwo mo ki: Hayy Malik gi 'Kwani Yahuuda/ mo.

<sup>19</sup> Dhali uni ki dor a'di 'kup ki cwa mo dhali 'tak a'di manya/ i is mo dhali uni ki lunj ki jin 'kupa 'dupuni bwambori a'di mo mmowu is ka 'cesh mo.

<sup>20</sup> Dhali ki uni miiki a'di ka mak mo tani uni ki 'cuk a'di burrinyen duk is jin ta jam po/ mo dhali uni ki hi'thki a'di burrinyem piti i is mo. Dhali uni ki sus a'di ka pije/ mo mmo'kosh ki cwany'cithan dhul mo be.

*Mo gi 'Koshuwa 'Kosh ki Cwany'cithan Dhul mo*

<sup>21</sup> Dhali uni ki budha Simaan gi Panj Kerawaan ki 'bi'th mo a'di jin ta CoAlaksandarus mo dhala Rupus mo, a'di jin yaki yampe mo, a'di jin yayi'd 'peni bampa/ mo, mmokal cwany'cithan dhul piti mo.

<sup>22</sup> Dhali uni suski a'di mo e mo jin yuku gway ka Gulgutha mo (jin ta 'pemen gwo jin onu mo ki: mo ma siman 'kup mo be.)

<sup>23</sup> Dhali uni ciki a'di yimana mura'th jin 'koshu e ki yiman cwa jin ta'da murr mo be. Hili a'di diki bu'th a'di mo be.

<sup>24</sup> Dhali uni 'koshki a'di ki cwany'cithan dhul mo dhali uni ki kwa/ burrinyem piti bwa mo e bwam uni mo mmo'ta'k to mo gom uni mo mmopi gwo 'pen ka pije/ mo, gom to jin mina uni 'baar mo ka 'dete/ 'dete/ 'taki bu'th mo be.

<sup>25</sup> Dhali ki mo ta'da tente/ pedonjon mo tani uni 'koshki a'di ki cwany'cithan dhul mo be.

<sup>26</sup> Dhali gwo jin onu apo/ a'di jin 'kwarkunu mo, a'di jin denkunu e mo tani o'd ka: Malik gi 'Kwani Yahuuda/ mo be.

<sup>27</sup> Dhali nyakki a'di mo tani uni ki 'kosh 'kwanin 'di/ isu/ ki cwany'cithan dhul mo, jan tal 'de/ ki me'da bim poros piti mo dhali jan kamu/ ki me'da biny cam piti mo be.

<sup>28</sup> Dhali Gwo ma Arungimis jin 'kwarkunu mo thimkunu mo, a'di jin o gwo mo ki: A'di karkunu mo nyakki imandhan gwo mo.

<sup>29</sup> Dhali uni gwansan kun iikin ki iimpe mo tani uni ciki a'di gura/ mo dhali pir 'kup buni mo dhali o gwo mo ki: Ayy. /E jin mini 'taki 'kosh gu'b gi mondheleladhelel mo dhali nyan a'di ka cim kwara mo tani

<sup>30</sup> wo'thi/ is pini mo ma, dhali thulu/ ka 'cesh 'pena po/ cwany'cithan dhul mo.

<sup>31</sup> Wakan si'da/ igasiis kun can miiki a'di ka mak mo ka rem 'kup nyakki iman'kwar to mo mmo/o gwo mo ki: A'di mishi tiya wo'th mo tani hili a'di

molki is piti woḥ moyi.

<sup>32</sup> Dhalka Kristhos jin ta'da Malik gi 'Kwani ma Israyiil thulu'd ka 'cesh shwane'dan 'pena po/cwany'ciḥan dhul mo ki ana mina par e mo dhali gam gwo is mo. Dhali uni gwansan kun nyakkunu 'kosh ki a'di ki cwany'ciḥan dhul mo tani uni si'da/sorki a'di mo be.

*Mowu ma Yesus mo*

<sup>33</sup> Dhali ka tente/ pu'dki'di bwan 'kup mo tani adhan mondhurumi'd pu'dki'd apo/ mony'ceshi 'baar mo ntaga tente/ ibum 'ban mo be.

<sup>34</sup> Dhali ka tente/ 'koni kwara mo tani Yesus cuuki'd ki dhan 'twa/ jin caaca mo ki: Iluwi, Iluwi, lama sabaktani, a'di jin ta 'pemen gwo jin onu ka: Arumgimis pem, Arumgimis pem, atinta dhalkina /e aha/ 'pen kan mo?

<sup>35</sup> Dhali unin tiya kun doshkin ki 'dishe/ cikki a'di mo dhali o gwo mo ki: Hili mo mo ma. A'di yukki'da Iliyya mo be.

<sup>36</sup> Dhali jan tal 'denj kamu/ guski'd mo dhali 'tu'da lipa/ ki yiman tom 'paca'd mo mmokar a'di e cwa mo dhali ciki a'di mmopi mo mmo/o gwo mo ki: Cora ma. Dhalki ana para e mo wakki/ Iliyya midi pu'du/ mo mmo'cuḥ a'di ka 'cesh mo.

<sup>37</sup> Dhala Yesus cuuki'd kagahara mo dhali a'di ki ci shi/in piti jin 'ko'd mo be.

<sup>38</sup> Dhali burrinye/ jin di'd e gu'b gi mondhelelad-helel mo tani a'di dherkunu bwa mo ka 'ban su/ mo 'peni bun'kup mo ntagi bum'pen mo be.

<sup>39</sup> Dhali ka mancil ma askar iss 'kwanimpa imudhe'd, a'di jin doshki'd ka karambuye/ i a'di mo tani parki a'di e mo mmoko wakan mo dhali mmoçi shi/in piti jin 'ko'd mo tani a'di ki o gwo

mo ki: Ka jin gana/ wathi/ yansan ta Ya/ ma Arumgimis mo be.

<sup>40</sup> Dhali up 'kokin mo mmun si'da/ mo kun hilki mo mo 'pena dhana/ mo. Uni gun 'koni bwaman uni mo tani ta iMariyam Magdaliyya mo dhala Mariyam jin ta KoYakuub mo jin ta a'di jin ta dhuru'c mo dhala Yusi mo dhala Saluuma mo be.

<sup>41</sup> Uni gun bathki a'di nsho'k mo me'd jin dikina a'di e Pany Jaliil mo dhali mii a'di to mo. Dhali up tana ris ka ris si'da/ kun pu'dkin mo kun nyakki ii ki a'di mo e Pa Urushaliim mo be.

*Mo jin Kanuwa Yesus mo*

<sup>42</sup> Dhali ki mom'pimpili/ pu'dki'd mo me'd jin tana a'di atee jin Thosonkunu to mo tani a'di jin ta'da tee jin t̄wa/a/ ka cim ma pesu/ mo tani

<sup>43</sup> aYuusup gi Pa Arraama a'di jin taku mo jin ta jan tal 'de/ gi montul is buni mo, a'di ki is piti si'da/ jin corki Bampa/ ma Arumgimis mo, a'di bu'thki'da du mo dhali yaa Bilaatus mo dhali dot a'di gwo mo gom bungwar is ma Yesus mo be.

<sup>44</sup> Dhala Bilaatus merki'd mo wakki/ a'di midi 'taki wu ki jahanne/ kan mo. Dhali a'di ki yuka mancil ma askar iss 'kwanimpa imudhe'd mo mmodot a'di gwo mo wakki/ a'di wuki'd hila/ mo walla a'di kapki wu mo.

<sup>45</sup> Dhali ki a'di da/ arki gwo 'pena mancil ma askar iss 'kwanimpa imudhe'd mo gom jwa jin wukina a'di mo tani a'di ki dhala Yuusup bway mo mmokal bungwar is piti mo be.

<sup>46</sup> Dhali a'di yolki burrinyen dhiny e jin kanuwa kan mo dhali a'di ki thul a'di ka 'cesh mo dhali 'tham a'di is ki burrinyen dhiny e jin kanuwa kan mo dhali 'thi a'di mo e jis wosh jin 'kolkunu mo

dhali 'danƙal dhan wosha caaga/ mo mmomu'th 'twaman jis jwa 'twa/ mo be.

<sup>47</sup> Mariyam Magdaliyya dhala Mariyam jin ta KoYusi parki mo e mo, mo jin 'thikunu a'di nycine/ mo be.

## 16

### *Mompinu mo*

<sup>1</sup> Dhali ka cima pesu/ peki'd mo tani aMariyam Magdaliyya dhala Mariyam jin ta KoYakuub mo dhala Saluuma mo uni yolki to kun kuyi mo ki kuy mo, wakan ki uni mini ii mo dhali 'koshki a'di i is mo be.

<sup>2</sup> Dhali ki mo ta mon'thamo/ ka tee jin twa/a/ ga dhas mo tani uni iikin mo e mon'kupaje mo ka tente/ sulki'd mo be.

<sup>3</sup> Dhali uni 'kokin mo mmo/o gwo ka rem 'kup mo ki: Kaja sa/ imidi ka'cki ana wosh 'peni 'twaman jis jwa mo?

<sup>4</sup> Dhali uni hilki mo 'kup ki mis mo dhali uni parki wosh e mo mmo'danƙalkunu a'di ka nyan'ko'd mo haali/ a'di caaca mo be.

<sup>5</sup> Dhali uni cikki bwaman jis jwa mo dhali uni parki wathin dhuruca kamu/ e mo mmoça'bki me'da bim poros mo mmohi'th burrinye/ jin ca'bki bany bany mo dhali uni merkin mo.

<sup>6</sup> Dhali a'di ki o uni gwo mo ki: Dhalku/ ki mer mo. Um nɔpkina Yesu gi Pa Naasira mo, a'di jin 'koshkunu jwa mo ki cwany'ciƙhan dhul mo. A'di cuki mis mo be. A'di diki di imahan mo be. Hili mo mo ma, mo jin karkina uni a'di nycine/ mo.

<sup>7</sup> Hili iiku/ mo dhali tor imanciƙ a'di gwo gwo mo dhala Buƙerus si'da/ ki a'di midi ya itwa/a/ ki um e

Pany Jaliil mo. Dhali e mun mo tani um mini par a'di e mo me'd gwo jin torkina a'di um mo be.

<sup>8</sup> Dhali uni iikin mo dhali so ka nwaça/ 'peni mon'kupaje mo haali/ mo jin deenu is mo dhali momer mo pu'dki'd apo/ uni mo be, dhali uni 'koki o gwoṅ kamu/ tal 'de/ mo ki wathiṅ kamu/ mo haali/ uni ko/ki is mo be.

*Yesus Piki'da Mariyam Magdaliyya I/is mo*

<sup>9</sup> Dhali ki a'di cukunu mis mo ka'tum ka cim jin twa/a/ ka dhas yan mo tani a'di piki'da Mariyam Magdaliyya i is ntwa/a/ mo a'di jin urkina a'di aruma 'cesh thusi pesu/ ka pije/ mo be.

<sup>10</sup> Ayim yaki'd mo dhali tor to gwansan ki uni gwansan kun nyaḱki 'ko ki a'di mo ki uni 'kokin mo mmo'ko ki bwan diṅ mo dhali mmoko mo be.

<sup>11</sup> Hili ki uni ciḱki gwo ki a'di diki'd ki e mo dhali mish ma yim mo tani uni 'koki gam gwom piti is mo be.

*Yesus Piki Imanciḱ A'di Gwo Isu/ I/is mo*

<sup>12</sup> Dhali yan'ko'd mo tani a'di piki unin sun tiya i is mo ki jamasa kamu/ mo me'd jin iikina uni ibway mo mmo/ii bampa/ mo.

<sup>13</sup> Dhali uni iikin ka nyaṅ'ko'd mo dhali tor aris to gwansan ki 'kwani 'baar mo. Hili uni 'koki gam gwom buni is mo be.

*Yesus Hashki Uni kun 'Koni 'Kume'd I'ce'dka 'De/ mo*

<sup>14</sup> Dhali yan'ko'd mo tani a'di ki pi uni 'kume'd i'ce'dka 'de/ i is uni 'cena mo me'd jin 'kokina uni eya tharabeesa mo mmoshwa to mo. Dhali a'di ki kucur uni ki gwo mo gom gwom buni gun 'kona uni ki gam is mo dhali goma dum buni kun 'bitha'bi'th

mo haali/ uni 'koki gam gwo gi uni gwansan is mo uni kun parki a'di e mo 'ko'di pim piti jin piyunu a'di mo be.

<sup>15</sup> Dhali a'di ki o uni gwo mo ki: Iiku/ mo e mony'chesi 'baar mo dhali ci gwom 'borga/ eya ris 'kwani 'baar mo kun ukkunu mo.

<sup>16</sup> I/a'di jin midi gam gwo is mo dhali minu mii ki yi'de/ mo tani a'di iminu iwoth mo be. Hili a'di jin diki gam gwo is mo tani a'di minu wak mo be.

<sup>17</sup> Dhali jamas mii gwansan mini bath uni gwansan kun gam gwo is mo: Ki gway pem mo tani uni mini ura ruma 'cesh ka piye/ mo dhali uni mini wal 'twa/ ki 'twan thisa tiya mo be.

<sup>18</sup> Uni mini bu'th tasha/ mo. Dhali wakki/ uni mini pi ton tiya kun 'kon ma ti'di cine/ mo tani a'di midi diki shi/ uni is mo be. Uni mini dhu me'd buni apo/ uni gun 'ba'thkin mo, dhali uni minu waç mo be.

*Yesus Shinkunu Bway Momis mo*

<sup>19</sup> Dhali yan'ko'd wakan Tapa Yesus 'ko'di a'di torki gwo e uni mo tani a'di bu'thkunu mo bway momis mo dhali di'd mo mmoça'b ka bim poros ma Arumgimis mo.

<sup>20</sup> Dhali uni iikin mo mmoçi gwo mo eya ris mo 'baar mo dhali Tapa diki'd mo mmonyakka tu'c mii ki uni mo dhali mmo'da/ki uni gwo kun çina uni sho'k mo ki jamas mii kun bathkunu mo be. Amen

## **Gwo Ma Arumgimis Uduk New Testament and OT Portions**

copyright © 2005 SIM International

Language: Uduk

Translation by: SIM International

### **Uduk New Testament and OT Portions**

Published by Bible Alliance Mission, 1983.

. If you are interested in obtaining a printed copy, please contact the SIM at [www.sim.org](http://www.sim.org).

. This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-10-02

---

PDF generated using Haiola and XeLaTeX on 18 Apr 2025 from source files dated 29 Jan 2022

f734434c-b6bd-5d21-abc6-692c3842e034